

**Jesus Nia bei-ala sira**

<sup>1</sup>Jesus Kristu nia bei-ala sira husi David to'o Abraao mak ne'e; <sup>2</sup>Abraao mak Isaac nia aman; Isaac Jacob nia aman; Jacob mak Juda ho nia alin sira nia aman. <sup>3</sup>Juda ho Tamar hahoris Fares no Zara, Fares mak Esrao nia aman; Esrao Arao nia aman; <sup>4</sup>Arao fali hahoris Aminadab; Aminadab Naassao nia aman; Naassao Salmoo nia aman. <sup>5</sup>Salmoo ho Racab hahoris Booz; Booz ho Rute hahoris Obed; Obed mak Jesse nia aman; <sup>6</sup>Jesse fali mak liurai David nia aman.

David, ho Urias nia fen, hahoris Salomao. <sup>7</sup>Salomao mak Roboao nia aman; Roboao Abias nia aman; Abias Asa nia aman. <sup>8</sup>Asa mak Josafa nia aman; Josafa Jorao nia aman; Jorao Ozias nia aman. <sup>9</sup>Ozias mak Joatao nia aman; Joatao Acaz nia aman; Acaz Ezequias nia aman. <sup>10</sup>Ezequias mak Manasses nia aman; Manasses Amos nia aman; Amos Josias nia aman. <sup>11</sup>Josias mak Jeconias ho nia maun alin sira nia aman, iha tempu dadur nian iha Babilonia.

<sup>12</sup>Liu tiha tempu dadur nian iha Babilonia, Jeconias hetan oan naran Salatiel. Salatiel mak Zorobabel nia aman; <sup>13</sup>Zorobabel mak Abiude nia aman; Abiude Eliaquim nia aman; Eliaquim Azor nia aman. <sup>14</sup>Azor Sadoque nia aman; Sadoque Aquim nia aman; Aquim Eliude nia aman; <sup>15</sup>Eliude Eleazar nia aman; Eleazar Mata nia aman; Mata Jacob nia aman; <sup>16</sup>Jacob hetan oan naran Jose, ne'ebé kaben ho Maria. Husi Maria moris Jesus, ne'ebé hanaran Kristu. <sup>17</sup>Nune'e husi Abraao to'o David, derasaun sanulu resin haat; husi David to'o tempu dadur nian iha Babilonia, derasaun sanulu resin haat; no husi tempu dadur nian iha Babilonia to'o Kristu, derasaun sanulu resin haat.

**Jesus nia moris**

<sup>18</sup>Jesus Kristu moris nune'e: Jose husu nanis ona atu kaben ho Maria, Jesus nia inan. Molok sira moris hamutuk, Maria ko'us tiha ona hodi Espiritu Santu nia kbiit. <sup>19</sup>Nia laen Jose, ne'ebé ema diak no lakohi hamoe Maria, hakotu atu husik deit nia. <sup>20</sup>Nia hanoin dau-daun buat ne'e, wainhira Na'i nia anju mosu ba nia iha mehi, dehan: "Jose, David nia oan, keta tauk simu Maria nudar o nia kaben, basa nia ko'us hodi Espiritu Santu nia kbiit. <sup>21</sup>Maria sei tur ahi oan mane ida ne'ebé o sei hanaran Jesus, basa Nia mak sei soi povu husi sira sala." <sup>22</sup>Ne'e hotu mosu, atu halo tuir lia ne'ebé Na'i hato'o husi profeta, dehan: <sup>23</sup>Fetoran ida sei ko'us no tur ahi oan mane ida, ne'ebé ema sei hanaran Emmanuel, katak Maromak ho ita." <sup>24</sup>Hader tiha husi mehi, Jose halo tuir buat ne'ebé Na'i nia anju haruka hodi simu nia kaben. <sup>25</sup>Maski Jose la dauk hamutuk ho nia, Maria tur ahi oan mane ida, ne'ebé nia hanaran Jesus.

**Ema matenek sira**

<sup>1</sup>Iha tempu liurai Herodes nian, wainhira Jesus moris iha Belem iha rai Judeia, ema matenek balun husi lorosa'e to'o ba Jerusalem. <sup>2</sup>Sira husu; "Judeu sira nia liurai ne'ebé foin moris iha los ne'ebé? Ami hare nia fitun iha lorosa'e no ami mai tuku tur hanai ba Nia." <sup>3</sup>Rona tiha ne'e, liurai Herodes hamutuk ho sidade tomak hakfodak teb-tebes. <sup>4</sup>Nia halibur am'lulik ulun sira no eskriba sira povu nian hodi husu ba sira Messias sei moris los iha ne'ebé. <sup>5</sup>Sira hatan ba nia: "Iha Belem, iha rai Judeia, basa profeta hakerek nanis ona: <sup>6</sup>'Belem, rai Juda, iha sidade boot sira Juda nian, la'os o mak kiik liu; basa husi o mak sei mosu Na'i Ulun ida ne'ebé sei ukun Ha'u nia povu Israel.'" <sup>7</sup>Tuir mai Herodes haruka bolu sub-subar deit ema matenek sira; nia husu ba sira sa loron fitun ne'e mosu ba sira. <sup>8</sup>Hafoin nia haruka sira ba Belem, dehan: "Imi ba to'ok. Imi sei husu tuir di-diak kona ba kiik oan ne'e. Hafoin, hetan tiha nia, imi mai fo hatene ha'u atu ha'u mos bele ba tuku tur hanai ba Nia."

<sup>9</sup>Rona tiha liurai, sira la'o ona. Fitun ne'ebé sira hare iha lorosa'e la'o uluk sira oin, to'o fatin ne'ebé kiik oan hela ba. <sup>10</sup>Hare tiha fitun, sira laran haksolok teb-tebes. <sup>11</sup>Tama tiha uma laran, sira hare kiik oan ho Nia Inan Maria. Sira tuku tur ba rai hodi adora Nia. Loke tiha sira nia ai-balun, sira hasa'e ba Nia sira nia buat ksolok; osan mean, ai-ben morin no mina morin. <sup>12</sup>Hatene husi mehi katak sira la bele fila hikis ba Herodes, sira fila ba sira rai husi dalan seluk.

**Halai ba Egiptu**

<sup>13</sup>Sira ba tiha, Na'i nia anju ida mosu ba Jose iha mehi hodi dehan: "Hamriik ba, lori kiik oan ho nia inan, halai ba Egiptu hodi hela iha ne'ebá to'o ha'u fo hatene ba o, basa Herodes sei buka Kiik oan ne'e atu oho." <sup>14</sup>Nia hader iha kalan, lori Kiik oan ho nia inan halai ba Egiptu, <sup>15</sup>hodi hela iha ne'ebá to'o Herodes mate. Nune'e sei sai tuir duni buat ne'ebé Na'i fo sai husi profeta: "Ha'u bolu Ha'u nia Oan husi Egiptu."

<sup>16</sup>Wainhira Herodes hare katak ema matenek sira lohi tiha nia, nia laran nakali teb-tebes; nia haruka oho labarik sira husi sidade no husi reinu tomak iha Belem, kiik oan sira tinan rua ba kraik, tuir tempu ne'ebé nia husu di-diak husi ema matenek sira. <sup>17</sup>Nune'e sai tuir duni buat ne'ebé profeta: Jeremias uluk dehan:

<sup>18</sup>"Sira rona lia ida iha Rama husi ema ne'ebé halerik no tanis maka'as: lia Raquel nian ne'ebé tanis nia oan sira; nia lakohi katak ema hamaus nia, basa sira la iha ona."

**Fila husi Egiptu**

<sup>19</sup>Herodes mate tiha, Na'i nia anju ida mosu ba Jose iha Egiptu iha mehi hodi dehan: "Hader tiha, lori fali Kiik oan ho nia inan ba rai Israel, basa sira ne'ebé hakarak oho Kiik oan ne'e mate tiha ona." <sup>21</sup>Jose hader mai, lori Kiik oan ho nia inan fila fali ba rai Israel. <sup>22</sup>Maibe, rona katak Arquelau mak ukun iha Judeia hodi nia aman nia fatin, Jose tauk atu ba ne'ebá. Nudar mehi hatudu, nia ba rai Galileia, <sup>23</sup>hodi hela iha sidade ida naran Nazare; nune'e sai tuir duni buat ne'ebé profeta sira dehan; "Ema sei hanaran Nia Nazare Oan."

**Joao Baptista, manu ain**

<sup>1</sup>Iha loron hirak ne'ebá Joao Baptista mosu hodi hanorin iha rai fuik maran Judeia nian. <sup>2</sup>Nia dehan: "Imi hakribi sala ba; reinu lalehan nian besik dau-daun ona." <sup>3</sup>Kona ba ema ne'e mak profeta Isaia dehan: "Lia ida hakilar iha rai fuik maran: Imi hadia Na'i nia luron, halos nia dalan sira!" <sup>4</sup>Joao hatais kamelu fulun, kesi knotak ho futukabun kulit ida; nia han lalaek ho baniben fuik. <sup>5</sup>Ema sira husi Jerusalem, husi Judeia tomak no husi Jordaun ba hotu buka nia, <sup>6</sup>hodi hakribi sira sala no simu baptisnu husi nia iha Jordaun. <sup>7</sup>Saduseu no Fariseu barak mai atu simu nia baptisnu. Hare tiha sira, nia dehan ba sira: "Samea nia oan sira, se mak hanorin imi halai husi kastigu ne'ebé atu mai dau-daun?" <sup>8</sup>Imi halo buat ne'ebé hatudu katak imi hakribi sala. <sup>9</sup>Keta bosok imi nia an rasik hodi dehan: 'Ami nia aman mak Abraao.' Basa ha'u dehan ba imi katak Maromak bele halo fatuk sira ne'e sai Abraao nia oan sira. <sup>10</sup>Ema tau ona baliun ba ai sira nia abut; ai sira ne'ebé la fo fuan diak sei tesi tiha hodi soe ba ahi. <sup>11</sup>Ha'u sarani imi ho be, nudar sinal hakribi sala nian. Maibe Ida ne'ebé mai tuir ha'u, maka'as liu ha'u, ha'u la soi atu kore nia sandalis tali. Nia sei sarani imi ho Espiritu Santu no ahi. <sup>12</sup>Lafatik iha ona nia liman; Nia sei hamos nia biti hodi halot trigu iha hoka; maibe Nia sei sunu trigu kain iha ahi ne'ebé sei la mate."

**Jesus simu baptisnu**

<sup>13</sup>La kleur Jesus mai husi Galileia to'o Joao atu simu baptisnu husi nia. <sup>14</sup>Maibe Joao lakohi hodi dehan: "Ha'u mak atu simu baptisnu husi Ita, nusa mak Ita mai buka fali ha'u?" <sup>15</sup>Jesus hatan ba nia: "Husik lai ba, diak liu ita halo tuir nune'e buat hotu ne'ebé los." Ho ida ne'e, Joao halo tuir ona. <sup>16</sup>Simu tiha baptisnu, Jesus sai husi be; lalehan nakloke, Nia hare Maromak nia Espiritu hanesan manu falur ida tun mai iha nia leten. <sup>17</sup>Husi lalehan lia ida dehan: "Ida ne'e mak ha'u nia Oan doben, ne'ebé fo ksolok mai ha'u."

**Diabu babeur Jesus**

<sup>1</sup>Liu tiha ne'e, Espiritu lori Jesus ba rai fuik maran, atu demoniu babeur Nia. <sup>2</sup>Nia hadera an iha loron haat nulu no kalan haat nulu nia laran, ikus mai Nia hamlaha. <sup>3</sup>Babeur na'in hakbesik ba Nia hodi dehan: "O Maromak Oan sa, haruka fatuk sira ne'e fila an ba paun." <sup>4</sup>Jesus simu: "Hakerek tiha ona: 'Ema la moris deit ho aihan, maibe ho liafuan sira ne'ebé sai husi Maromak futar ibun.'" <sup>5</sup>Tuir mai demoniu lori Nia ba sidade santa, tau Nia iha Templu tutun, <sup>6</sup>hodi dehan ba Nia: "O Maromak Oan sa, soe o nia an husi ne'e ba kraik, basa hakerek nanis ona: 'Kona ba O, Nia sei fo ordem ba sira; sira sei tane O iha sira liman, atu o nia ain sira keta kona fatuk ruma.'" <sup>7</sup>Jesus hatan ba nia: "Hakerek nanis mos ona: 'O keta babeur Na'i o nia Maromak.'" "

<sup>8</sup>Hafoin demoniu lori Nia ba foho aas liu hodi hatudu mundu nia reinu hot-hotu ho nia gloria ba Nia, <sup>9</sup>hodi dehan ba Nia: "Buat sira ne'e hotu ha'u sei fo ba O, naran O hakneak hodi adora ha'u." <sup>10</sup>Ho ida ne'e, Jesus dehan ba nia: "Sai tiha, Satanas, basa hakerek ona: 'O sei adora o nia Na'i, o nia Maromak; ba Nia deit mak o sei hanai.'" <sup>11</sup>Nune'e, diabu husik tiha Nia, sira mai serbi ba Nia.

### Jesus hanorin iha Galileia

<sup>12</sup>Rona tiha katak ema dadur ona Joao, Jesus ba Galileia. <sup>13</sup>Husik tiha Nazare, Nia ba fali Kafarnaum, sidade besik tasi ibun, rai Zabulaun ho Neftali nian, <sup>14</sup>atu sai tuir buat ne'ebé profeta Isaias fo sai tiha ona <sup>15</sup>Rai Zabulaun, rai Neftali, dalan tasi nian, Jordaun sorin ba, Galileia gentiu sira nian, <sup>16</sup>povu ne'ebé uluk horik iha nakukun laran hare roman boot ida; naroman mosu ba sira ne'ebé uluk hela iha nakukun mate nian.' <sup>17</sup>Houri oras ne'e, Jesus hahu hanorin hodi dehan: "Imi hakribi imi sala ba, basa reinu lalehan nian besik dau-daun ona."

### Bolu eskolante sira

<sup>18</sup>La'o dau-daun tuir tasi ibun Galileia nian, Nia hare maun alin rua; Simao, bolu katak Pedro, ho nia alin Andre. Sira soe hela dai ba tasi, basa sira ema hakaillor ikan. <sup>19</sup>Nia dehan ba sira: "Imi tuir Ha'u mai, Ha'u sei halo imi sai hakaillor ema nian." <sup>20</sup>Sira husik kedas dai hodi la'o tuir Nia.

<sup>21</sup>La'o uitoan ba oin, Nia hare maun alin rua seluk: Tiago, Zebedeu nia oan, ho nia alin Joao. Sira hadia hela dai iha ro laran hamutuk ho sira nia aman Zebedeu. Nia bolu sira, <sup>22</sup>sira husik kedas ro ho sira nia aman hodi tuir Nia.

### Haklaken evangeliu no fo isin diak

<sup>23</sup>Hafoin Nia hahu la'o lemo Galileia tomak hodi hanorin iha sinagoga sira, haklaken liafuan diak reinu nian no fo isin diak ba moras sira iha povu nia leet. <sup>24</sup>Nia naran boot iha rai Siria tomak. Sira lori ba Nia ema sira hotu ne'ebé terus husi buat aat no susar oi-oin, sira ne'ebé demoniu tama iha laran, sira ne'ebéulun halai no sira ne'ebé isin mate; Nia fo isin diak ba sira <sup>25</sup>Ema lubun boot tuir Nia husi Galileia, husi Dekapoli, husi Jerusalem, husi Jordaun sorin balun ba.

## 5

### Rahun diak sira.

<sup>1</sup>Hare tiha ema lubun boot, Jesus sa'e ba foho ida. Wainhira Nia tur tiha, eskolante sira hakbesik ba Nia, <sup>2</sup>Nia hahu hanorin sira hodi dehan nune'e: <sup>3</sup>"Ksolok ba ema sira ne'ebé kiak iha laran, basa reinu lalehan sira nian. <sup>4</sup>Ksolok ba sira ne'ebé haraik an, basa sira sei simu rai nudar liman rohan. <sup>5</sup>Ksolok ba sira ne'ebé tanis, basa sira sei hetan kmaan. <sup>6</sup>Ksolok ba sira ne'ebé hamlaha no hamrook ba justisa, basa sira sei bosu. <sup>7</sup>Ksolok ba sira ne'ebé laran luak, basa sira sei hetan laran luak. <sup>8</sup>Ksolok ba sira ne'ebé laran mos, basa sira sei hare Maromak. <sup>9</sup>Ksolok ba sira ne'ebé buka dame, basa ema sei bolu sira Maromak oan. <sup>10</sup>Ksolok ba sira ne'ebé ema duni, fo terus, tan buka justisa, basa reinu lalehan sira nian. <sup>11</sup>Ksolok ba imi wainhira, tamba Ha'u, ema hateten aat imi, duni imi hodi bobar lia bosok hasouru imi. <sup>12</sup>Imi haksolok ba, foti neon ba, basa imi nia kolen iha lalehan wa'in liu; basa nune'e mos sira duni profeta sira ne'ebé mai uluk liu imi."

### Eskolante sira nia knaar.

<sup>13</sup>Imi masin rai nian, maibe masin lakon karik nia mer, nia sei hamer an oin sa? Nia la soi ona ba buat ida, soi deit atu soe ba liur, ema atu sama. <sup>14</sup>Imi mundu nia roman. Sidade ne'ebé harii iha foho leten, la bele subar an. <sup>15</sup>Ema la sunu ahi-oan hodi tau iha fatin okos, maibe tau iha fatin aas atu leno ema hotu iha uma laran. <sup>16</sup>Imi nia roman sei nabilan mos hanesan ne'e iha ema sira oin, atu sira hare imi nia hahalok diak sira hodi hahi imi nia Aman iha lalehan."

### Ukunfuan tuan no foun

<sup>17</sup>Imi keta hanoin Ha'u mai atu hasai tiha ukunfuan no profeta sira; Ha'u mai la'os atu hasai, maibe atu halo tuir lo-los. <sup>18</sup>Ha'u dehan lialos ba imi: maski lalehan no rai lakon, ukunfuan nia baluk ida mos sei la lakon, sei kumpri hotu. <sup>19</sup>Ne'e duni, ema ne'ebé la halo tuir ukunfuan kiik liu sira ne'e ida hodi hanorin nune'e ba ema, nia sei sai kiik liu iha reinu lalehan. Maibe ema ne'ebé halo tuir hodi hanorin mos ba ema seluk, ema ne'e sei sai boot iha reinu lalehan. <sup>20</sup>Basa ha'u dehan ba imi katak imi nia justisa la los liu karik eskriba no fariseu sira nian, imi sei la tama iha reinu lalehan."

<sup>21</sup>"Imi rona katak uluk ema dehan ba ita nia bei-ala sira: 'O keta oho; ema ne'ebé oho, sei simu kastigu.' <sup>22</sup>Ha'u fali dehan ba imi; 'Ema ne'ebé laran nakali hasouru nia maun alin sira sei hatan iha tribunal; ema ne'ebé bolu nia 'bulak' sei terus iha ahi infernu nian.' <sup>23</sup>Ne'e duni, wainhira o atu hasa'e dau-daun o nia buat karan iha altar, o hanoin fali katak o nia maun alin ida hirus o, <sup>24</sup>husik o nia buat karan iha altar hodi ba uluk dame malu ho nia, hafoin mai hasa'e o nia buat karan. <sup>25</sup>Buka dame malu lalais ho nia funu balun wainhira imi la'o hamutuk ba tribunal; keta halo ne'ebé nia fo o ba juis fo fali o ba guarda, guarda hatama o ba kadeia. <sup>26</sup>Ha'u dehan lo-los ba o, o sei la sai husi ne'ebé to'o o selu hotu."

<sup>27</sup>"Imi rona ema dehan; 'O keta sala ho ema nia kaben.' <sup>28</sup>Maibe Ha'u dehan ba imi; 'Ema ne'ebé hateke ba feto ida hodi kaan nia, nia halo ona sala foer ho nia iha nia laran.' <sup>29</sup>Ne'e duni o nia matan los dada o karik ba sala, losu sai tiha nia, soe ba dook; lakon o nia matan ida, diak liu fali monu ba infernu ho o nia isin lolon tomak."

<sup>30</sup>O nia liman los mak dada karik o ba sala, tesi tiha nia, soe ba dook; lakon o nia liman ida, diak liu fali monu ba infernu ho isin lolon tomak. <sup>31</sup>Ema uluk dehan tan: 'Ema ne'ebé soe nia feen, sei fo surat soe malu nian ba nia.' <sup>32</sup>Maibe Ha'u dehan ba imi: 'Ema ne'ebé soe nia feen tan adulteriu, nia bele halo nia feen monu ba adulteriu.'" "

<sup>33</sup>"Nune'e mos imi rona uluk ema dehan ba bei-ala sira: 'Halo tuir o nia juramentu, kumpri buat ne'ebé o jura ba Na'i.' <sup>34</sup>Maibe Ha'u dehan ba imi: 'Imi la bele jura kona ba buat naran ida. Keta jura hodi lalehan basa ne'e Maromak nia kadunan; <sup>35</sup>Keta jura hodi rai, basa ne'e Na'i nia sama fatin; keta jura mos hodi Jerusalem, basa nia Liurai boot nia sidade. <sup>36</sup>Keta jura hodi o niaulun, basa o la bele halo o nia fuuk lahan ida sai mutin ka metan. <sup>37</sup>Maibe imi sei koalial hanesan ne'e: Nune'e, nune'e; la nune'e, la nune'e. Liu fali ne'e, mai husi ida ne'ebé aat.'" "

<sup>38</sup>Imi rona ema uluk dehan: 'Matan selu ho matan, nehan selu ho nehan.' <sup>39</sup>Maibe Ha'u dehan ba imi: 'Keta simu hasouru ema aat. Ema ruma basa karik o nia oin los, se'e tan o nia oin karuk ba nia. <sup>40</sup>Ema ruma hakarak haksasuk malu ho o atu hadau o nia faru karik, fo tan o nia tais ba nia. <sup>41</sup>Ema ruma obriga karik o atu la'o kilometru ida, la'o ho nia kilometru rua ba. <sup>42</sup>Fo ba ema ne'ebé husu, keta fila kotuk ba sira ne'ebé husu impresta.'" "

### Domin ba funu balun sira

<sup>43</sup>"Imi rona ema uluk dehan: 'Hadomi o nia maluk, rai odi hasouru o nia funu balun.' <sup>44</sup>Ha'u fali dehan ba imi: 'Hadomi imi nia funu balun sira, harohan ba sira ne'ebé duni imi, <sup>45</sup>atu imi sai imi Aman iha lalehan nia oan sira. Basa Nia halo loron mosu ba ema diak no ba ema aat, halo mos udan ben monu ba ema laran mos no ba ema sala na'in hanesan. <sup>46</sup>Basa imi hadomi karik ema ne'ebé hadomi imi, imi sei simu kolen ne'ebé? <sup>47</sup>Imi kumprimenta deit imi nia maun alin sira, imi halo buat foun sa ida? Ema gentiu sira mos la halo hanesan ne'e? <sup>48</sup>Imi buka sai diak lo-los, hanesan imi nia Aman iha lalehan diak lo-los.'" "

## 6

### Fo esmola oin sa

<sup>1</sup>Imi keta halo buat diak iha ema sira oin atu sira hare imi. Halo nune'e karik, imi sei la simu imi nia kolen husi imi nia Aman ne'ebé iha Lalehan. <sup>2</sup>Ne'e duni, wainhira o fo esmola, keta husik ema hu'u karau dikur iha o nia oin, hanesan ema laran makerek sira halo iha sinagoga ka iha luron sira, atu ema hahi sira.

Ha'u dehan lialos ba imi, sira simu ona sira nia kolen. <sup>3</sup>Maibe, wainhira o fo esmola, o nia liman karuk la bele hatene sa ida mak o nia liman los halo, <sup>4</sup>atu ema ida la bele hatene o nia esmola, no o nia Aman ne'ebé hare buat subar, sei fo kolen ba o."

#### Harohan oin sa

<sup>5</sup>"Wainhira imi halo orasaun, keta halo hanesan ema laran makerek sira, ne'ebé gasta harohan hodi hamriik iha sinagoga sira. Tebes, Ha'u dehan ba imi, sira simu ona sira nia kolen. <sup>6</sup>Maibe, wainhira o harohan, tama iha o nia kuartu laran, taka odamatan hodi resa sumik ba o nia Aman, basa Nia ne'ebé hare buat sumik, sei fo kolen ba o. <sup>7</sup>Iha imi nia orasaun, keta koalía barak hanesan gentiu sira; basa sira hanoin katak, ho sira nia liafuan bara-barak, Na'i sei rona sira. <sup>8</sup>Imi keta halo hanesan sira, basa imi nia Aman hatene buat ne'ebé imi kuran molok imi husu ba Nia. <sup>9</sup>Ne'e duni, imi sei harohan nune'e: 'Ami Aman iha lalehan, tulun ami atu hahi Ita naran. <sup>10</sup>Halo ita nia reinu to'o mai ami; tulun ami halo tuir Ita nia hakarak iha rai nudar iha lalehan. <sup>11</sup>Haraik aihan lor-loron nian mai ami. <sup>12</sup>Haraik perdua ba ami nia sala, nudar ami perdua sira ne'ebé halo aat ami. <sup>13</sup>Keta husik ami monu ba tentasaun, maibe hasai ami husi buat aat.

<sup>14</sup>Basa imi perdua karik ema sira nia sala, imi Aman iha lalehan mos sei perdua imi nia sala sira. <sup>15</sup>Maibe imi la perdua karik ema sira nia sala, imi nia Aman mos sei la perdua imi nia sala sira."

#### Hadera an oin sa

<sup>16</sup>"Wainhira imi hadera an, keta hatudu oin sin, hanesan ema laran makerek sira, ne'ebé halo sira oin aat atu ema hare katak sira hadera an. Tebes, Ha'u dehan ba imi katak ema sira ne'e simu tiha ona sira nia kolen. <sup>17</sup>Maibe, wainhira o hadera an, tau mina morin ba o ulun, fase oin, <sup>18</sup>atu ema la bele hatene katak o hadera an; o nia Aman ne'ebé subar hela mak hatene; nune'e o nia Aman, ne'ebé hare husi nia subar fatin, sei fo kolen ba o."

#### Maromak no rikusoi

<sup>19</sup>"Imi keta halot hamutuk murak iha rai, ne'ebé meak ho ular han mohu no na'okten sira sobu lutu hodi na'ok. <sup>20</sup>Maibe imi halibur murak iha lalehan, iha ne'ebé ular no meak la hamohu sira, na'okten sira mos la sobu lutu hodi na'ok. <sup>21</sup>Basa iha fatin ne'ebé o tau o nia murak, o nia fuan sei hela mos iha ne'ebá. <sup>22</sup>O nia isin nia ahi-oan mak o nia matan; o nia matan diak karik, o nia isin tomak sei nabilan. <sup>23</sup>Maibe o nia matan aat karik, o nia isin tomak sei iha nakukun hela. Ne'e duni, roman iha o sai nakukun karik, nakukun ne'e sei sai boot duni! <sup>24</sup>Ema ida la bele serbi ba Na'i ulun rua, basa nia sei rai odi hasouru ida hodi hadomi ida seluk, ka nia sei serbi ida hodi hakribi ida seluk. Imi la bele serbi hamutuk Maromak no osan."

#### Maromak tau matan

<sup>25</sup>"Tan ne'e Ha'u dehan ba imi: keta hanoin resin kona ba imi nia moris, atu han sa ida; ka ba imi nia isin lolon, atu hatais sa ida. <sup>26</sup>Imi hare ba manu sira lalehan: sira la kuda, la kari, la halot iha hoka; no imi nia Aman iha lalehan fo han sira. Imi la folin liu sira? <sup>27</sup>Imi ida ne'ebé mak hodi hanoin barak, bele hanaruk nia moris sasukat ida tan?"

<sup>28</sup>"Tan sa imi hanoin resin kona ba hatais? Imi hare ai-funan liri sira ne'ebé moris iha rai. Sira la serbisu, la teik. <sup>29</sup>Maibe, Ha'u dehan ba imi katak Salomao mos iha nia kmanek wa'in tomak la hatais hanesan sira ne'e ida. <sup>30</sup>Ne'e duni, Maromak fo hatais karik hanesan ne'e ba du'ut rai nian ne'ebé ohin iha no aban soe ba ahi, Nia sei la halo liu tan fali ba imi, ema ne'ebé fiar namlele?"

<sup>31</sup>"Ne'e duni, imi keta laran susar hodi dehan: Ita sei han ka hemu, ka hatais los sa ida? <sup>32</sup>Gentiu sira buka buat ne'e sira hotu. Maibe imi nia Aman hatene katak imi kuran buat sira ne'e hotu. <sup>33</sup>Imi buka uluk knanain Maromak nia reinu ho nia justisa; buat sira seluk sei fo liu tan ba imi. <sup>34</sup>Ne'e duni imi keta hanoin barak kona ba aban, basa sei hetan nia rasik nia susar. Ba loron ida-ida to'o ona ho nia rasik nia serbisu."

## 7

#### Hanoin aat ema

<sup>1</sup>"Imi keta hanoin aat ema, atu ema la bele hanoin aat imi. <sup>2</sup>Basa imi hanoin aat ema karik, ema mos sei hanoin aat imi: hanesan imi sukat ema, nune'e mos ema sei sukat imi. <sup>3</sup>Tansa o hare du'ut lahan ida iha o nia maluk nia matan, maibe la hare ai-kabelak ida iha o nia matan rasik? <sup>4</sup>Oin sa o bele dehan ba o nia maluk: <sup>5</sup>'Husik ha'u hasai tiha du'ut lahan husi o nia matan,' wainhira ai-kabelak ida sei hela o nia matan laran? O laran makerek, hasai uluk lai ai-kabelak husi o nia matan, hafoin mak o sei hare hodi hasai du'ut lahan husi o nia maluk matan."

<sup>6</sup>"Imi keta fo buat ne'ebé santu ba asu sira, keta soe imi nia murak ba fahi sira, keta sira ne'e sama imi nia murak, hafoin fila hasouru imi hodi tata les imi."

#### Orasaun nia folin boot

<sup>7</sup>"Imi husu, imi sei simu; buka, sei hetan: tuku odamatan, odamatan sei nakloke. <sup>8</sup>Basa ema ne'ebé husu, simu; ema ne'ebé buka, hetan; no ema ne'ebé baku, odamatan sei nakloke. <sup>9</sup>Imi ida ne'ebé, nia oan husu karik paun, sei fo fatuk ba nia? <sup>10</sup>Ka, husu karik ikan, sei fo samea ida ba nia? <sup>11</sup>Ne'e duni, imi sira, ne'ebé ema aat, hatene fo buat diak ba imi nia oan sira, imi nia Aman iha lalehan sei fo fali buat diak liu tan ba sira ne'ebé husu ba Nia."

<sup>12</sup>"Ne'e duni, buat hotu ne'ebé imi hakarak ema halo ba imi, imi mos sei halo buat ne'e ba sira; basa ida ne'e mak ukunfuan no Profeta sira."

#### Dalan rua

<sup>13</sup>"Imi tama husi odamatan kloot; basa odamatan boot no dalan luan mak lori ema ba malisan, no ema barak liu husi ne'e. <sup>14</sup>Maibe odamatan kloot tebes no dalan kiik duni mak lori ema ba moris, no ema utoan deit mak hetan nia."

#### Profeta bosok sira

<sup>15</sup>"Imi matan moris kona ba profeta bosok sira ne'ebé mosu ba imi nudar bibi sira, maibe iha laran sira asu fuik nehan kroat. <sup>16</sup>Imi sei hatene sira husi sira nia fuan. Ema ku'u uvas husi ai fuik, ka figueira husi ai-tarak? <sup>17</sup>Lo-los, ai hotu ne'ebé diak fo fuan diak, no ai ne'ebé aat fo fuan aat. <sup>18</sup>Ai diak la bele fo fuan aat, no ai aat la bele fo fuan diak. <sup>19</sup>Ai sira ne'ebé la fo fuan diak sei tesi tiha hodi soe ba ahi. <sup>20</sup>Ne'e duni, husi sira nia fuan mak imi sei hatene sira."

#### Eskolante diak los

<sup>21</sup>"*La'os ema ne'ebé dehan mai Ha'u: 'Na'i, Na'i!' mak sei tama iha reinu lalehan, maibe ema ne'ebé halo tuir Ha'u Aman iha lalehan nia hakarak. <sup>22</sup>Ema barak sei dehan mai Ha'u iha loron ne'ebá: 'Na'i, Na'i, la'os hodi Ita Boot nia naran mak ami koalía lia profeta nian, duni sai tiha diabu sira, no mos halo milagre barak?'* <sup>23</sup>Iha oras ne'ebá Ha'u sei hatan ba sira: 'Ha'u la hatene imi; hadook an tiha husi Ha'u, imi sira ne'ebé halo aat.'"

<sup>24</sup>"*Ema ne'ebé rona Ha'u nia liafuan hirak ne'e hodi moris tuir, nia hanesan ema matenek ne'ebé harii nia uma iha fatuk leten; <sup>25</sup>udan tau, mota suli, anin hu'u hasouru uma ne'e, maibe uma la monu basa hamriik iha fatuk leten. <sup>26</sup>Ema ne'ebé rona Ha'u nia liafuan hirak ne'e, maibe la halo tuir, nia hanesan ema beikten ne'ebé harii nia uma iha rai henek leten. <sup>27</sup>Udan tau, mota suli, anin hu'u hasouru hodi sobu uma ne'e; sobu duni aat liu.*"

<sup>28</sup>"Wainhira Jesus koalía hotu tiha, ema lubun hakfodak ho nia doutrina, <sup>29</sup>basa Nia hanorin sira hanesan ema ne'ebé iha kbiit, la'os hanesan eskriba no fariseu sira.

## 8

#### Ema moras lepra hetan diak

<sup>1</sup>Wainhira Nia tun husi foho, ema lubun boot ida la'o tuir Nia, <sup>2</sup>Iha oras ne'ebá, ema moras lepra ida mai monu iha nia oin hodi dehan ba Nia: "Na'i, Ita boot hakarak karik, bele hamos atan oan." <sup>3</sup>Jesus lolo liman, kona nia, dehan: "Ha'u hakarak, sai mos ba!" Iha oras ne'ebá kedas nia moras lakon. <sup>4</sup>Maibe Jesus hateten ba nia: "O keta dehan ba ema ida, maibe ba hatudu an ba am'lulik hodi hasa'e buat karan ne'ebé Moises haruka nudar sasin ba sira."

#### **Senturiaun nia atan**

<sup>5</sup>Tama tiha Kafarnaum, senturiaun ida hakbesik ba Nia hodi harohan: <sup>6</sup>"Na'i, ha'u nia atan laten iha uma, isin mate, terus aat liu." <sup>7</sup>Jesus dehan ba nia: "Ha'u sei ba halo nia sai diak." Senturiaun simu fali <sup>8</sup>"Na'i, ha'u la soi Ita boot tama iha ha'u nia uma laran, maibe Ita boot koalita lia ida deit, ha'u nia atan sei hetan isin diak; <sup>9</sup>basa ha'u mos tuir sira ne'ebé ukun ha'u, no mos iha soldadu sira ne'ebé tuir ha'u. Ha'u dehan ba ida, 'O ba, 'nia ba; ba ida seluk, 'Halo ne'e, 'nia halo." <sup>10</sup>Rona tiha nia, Jesus hakfodak hodi dehan ba sira ne'ebé tuir Nia: "Tebes Ha'u dehan ba imi, Ha'u seidauk hetan ema ida ho fiar boot hanesan ne'e iha Israel. <sup>11</sup>Ha'u dehan ba imi katak husi lorosa'e no loromonu ema barak sei mai tur iha mesa ho Abraao, Isaac no Jacob iha reinu lalehan nian; <sup>12</sup>maibe reinu nia oan sira sei soe ba nakukun iha liur, iha ne'ebá sira sei tanis hodi ruun nehan." <sup>13</sup>Hafoin Nia dehan ba senturiaun: "Ita la'o ona ba, buat hotu sei sai tuir ita nia fiar." Iha duni oras ne'ebá, atan hetan fali isin diak.

#### **Pedro nia banin feto**

<sup>14</sup>Tuir mai, tama tiha iha Pedro nia uma hodi hare nia banin feto ne'ebé moras toba hela. <sup>15</sup>Jesus kaer nia liman, isin manas husik tiha nia. Nia hamriik mai hodi hahu serbi sira.

<sup>16</sup>Iha loraik, sira lori mai to'o Nia ema barak ho diabu iha laran. Nia duni sai lulik sira ho nia liafuan hodi fo isin diak ba sira hotu ne'ebé moras. <sup>17</sup>Ne'e atu halo tuir buat ne'ebé profeta Isaia dehan: 'Nia sei simu ita nia moras hodi lori ita nia moras hodi lori ita nia terus.' <sup>18</sup>Hare tiha ema lubun boot hale'u Nia, Jesus hakotu atu hakat liu ba sorin balun ba.

#### **Atu tuir Jesus, husik buat hotu**

<sup>19</sup>Eskriba ida mai hasouru Nia, dehan: "Mestre, ha'u sei tuir Ita ba fatin hotu ne'ebé Ita ba." <sup>20</sup>Jesus dehan ba nia: "Laku sira kuak iha, manu sira lalehan nian knuuk iha; maibe Oan Mane fatin la iha atu tau nia ulun."

<sup>21</sup>Eskolante ida fali hateten ba Nia: "Na'i, husik ha'u ba uluk lai hakoi ha'u nia aman." <sup>22</sup>Maibe Jesus hatan ba nia: "O mai tuir Ha'u; husik mate sira hakoi sira nia mate."

#### **Tasi boot hakmatek**

<sup>23</sup>Tuir mai Jesus sa'e ba ro hamutuk ho Nia eskolante sira. <sup>24</sup>Teki-teki, tasi hahu si'ak maka'as, laloran taka ro tomak, maibe Nia toba dukur hela. <sup>25</sup>Eskolante sira hakbesik ba Nia hodi fanu Nia, dehan: "Na'i, soi ami, ami atu mate." <sup>26</sup>Jesus dehan ba sira: "Tansa imi tauk, imi sira ne'ebé fiar namlele?" Hafoin Nia hamriik hodi haruka anin ho tasi, no buat hotu hakmatek. <sup>27</sup>Ema sira hakfodak hodi dehan: "Ema ne'e se los, ne'ebé anin ho tasi mos halo tuir deit."

#### **Ema sira ho diabu iha laran sai diak fali**

<sup>28</sup>To'o tiha sorin balun ba, iha rai Gadara, ema na'in rua diabu iha laran mai husi rate hasouru Nia. Sira si'ak la diak, halo ema ida la bele liu husi dalan ne'ebá. <sup>29</sup>Teki-teki sira hakilar. "O hakarak sa ida husi ami, Jesus, Maromak Oan? Tempu seidauk to'o, O mai iha ne'e haterus ami?"

<sup>30</sup>Besik iha ne'ebá fahi lubuk ida han du'ut dau-daun. <sup>31</sup>Diabu sira husu ba Nia: "O duni sai karik ami, haruka ami ba fahi sira ne'e." <sup>32</sup>Nia dehan ba sira: imi ba! Sira sai ba tama iha fahi sira, ne'ebé haksoit husi rai tatinis ba tasi hodi mate hotu iha ne'ebé laran. <sup>33</sup>Fahi atan sira halai ba sidade, tomak sai mai hasouru Jesus. Hare sira diabu iha laran. <sup>34</sup>Sidade tomak sai mai hasouru Jesus. Hare tiha Nia, sira husu ba Nia atu sai tiha husi sira nia rain.

### **9**

#### **Ema moras isin mate hetan diak**

<sup>1</sup>Liu tiha ne'e, Nia sa'e ba ro, hakur tasi hodi ba iha ninia sidade. <sup>2</sup>Sira mai hatudu ba Nia ema isin mate ida, laten hela iha hadak ida. Hare tiha sira nia fiar, Jesus dehan ba ema moras: "Oan, laran metin ba, o nia sala sira hetan ona perdua." <sup>3</sup>Eskriba sira balun dehan iha sira nia laran: "Ema ne'e hateten aat Maromak" <sup>4</sup>Hatene tiha sira nia hanoin, Jesus dehan ba sira: Tansa imi hanoin aat iha imi nia laran? <sup>5</sup>Ida ne'ebé mak la susar, dehan: "O nia sala sira hetan tiha perdua", ka dehan "O hamriik, la'o ba?" <sup>6</sup>Diak, atu imi hatene katak iha rai Oan Mane iha kbiit atu kasu sala, Nia dehan ba ema isin mate; "O hamriik tiha, foti o nia hadak, la'o ba o nia uma. <sup>7</sup>Nia hamriik duni hodi la'o ba nia uma. <sup>8</sup>Hare tiha ne'e, ema lubun hakfodak ho tauk hodi hasa'e gloria ba Maromak ne'ebé fo ba ema kbiit ida hanesan ne'e."

#### **Jesus bolu Mateus**

<sup>9</sup>Sai tiha husi ne'ebá Jesus hare ema ida naran Mateus tur hela iha kobra impostu fatin. Jesus dehan ba nia: "O tuir Ha'u mai!" Nia Hamriik hodi tuir Jesus. <sup>10</sup>Tur tiha iha uma laran, ema publikanu no maksalak barak mai tur ho Nia, hamutuk ho nia eskolante sira. <sup>11</sup>Hare tiha ne'e, fariseu dehan ba eskolante sira: "Nusa mak imi nia Mestre han hamutuk ho publikanu no maksalak sira?" <sup>12</sup>Rona tiha sira, Jesus dehan: "La'os sira ne'ebé isin diak mak kuran doutor, maibe sira moras. <sup>13</sup>Imi buka hatene liafuan ne'e katak sa: 'Ha'u hakarak laran luak liu fali sakrifisiu.' Basa Ha'u mai la'os atu bolu ema diak sira, maibe ema maksalak sira."

<sup>14</sup>Liu tiha ne'e, Joao nia eskolante sira hakbesik ba Nia, dehan: "Tansa mak ami ho fariseu sira hadera an, maibe o Nia eskolante sira lae?" <sup>15</sup>Jesus hatan ba sira: "Laen nia belun sira bele laran susar wainhira laen sei hela ho sira? Loron sei to'o, wainhira ema sei hasai laen husi sira leet; iha loron ne'e mak sira sei hadera an."

<sup>16</sup>"Ema ida la bele taka hena tuan nia kuak ho hena foun, basa hena foun les hena tuan nia baluk, halo kuak sai boot liu. <sup>17</sup>Ema la tau tua foun iha kusi tuan; lae karik, kusi nakfera, tua nakfakar no kusi aat hotu. Tau tua foun iha kusi foun; nune'e buat rua ne'e ida la lakon."

#### **Feto moras ran suli sai. Jairo nia oan feto.**

<sup>18</sup>Wainhira Jesus koalita dau-daun ba sira, sinagoga nia ulun ida hakbesik ba Nia hodi monu iha nia oin, dehan: "Ha'u nia oan feto foin mate; maibe Ita boot hiit An mai tau liman ba nia, nia sei moris." <sup>19</sup>Jesus hamriik hodi la'o tuir nia hamutuk ho eskolante sira.

<sup>20</sup>Iha oras ne'e, feto ida ne'ebé ran suli sai tinan sanulu resin rua ona, hakbesik ba Nia husi kotuk hodi kona nia tais ninin, <sup>21</sup>basa nia dehan iha nia laran: "Ha'u kona karik ninia tais, ha'u sei hetan isin diak." <sup>22</sup>Fila tiha ba kotuk, Jesus hare nia hodi dehan: "Ha'u oan, laran metin ba, o nia fiar soi ona o." Iha oras ne'e kedas, feto ne'e hetan fali isin diak.

<sup>23</sup>Wainhira Nia to'o na'i ulun nia uma, hare tiha ema haklalak no barak seluk hakilar maka'as. Nia dehan; <sup>24</sup>"Imi sai tiha. Labarik la mate; nia toba deit." Sira hamnasa Nia. <sup>25</sup>Wainhira ema lubun sai ona, Nia tama ba laran, kaer labarik feto nia liman, no labarik hamriik. <sup>26</sup>Lia kona ba buat ne'e naklekar iha rai tomak ne'ebá.

#### **Matan delek rua ho monok ida sai diak**

<sup>27</sup>Jesus sai husi ne'ebá, ema matan delek na'in rua tuir Nia hodi hakilar, dehan: "David nia Oan, sadia ami." <sup>28</sup>To'o tiha uma, matan delek sira hakbesik ba Nia. Jesus dehan ba sira: "Imi fiar, katak Ha'u bele halo buat ne'e?" Sira hatan ba Nia: "Ami fiar, Na'i!" <sup>29</sup>Nia kona sira nia matan, dehan: "Sai diak ba tuir imi fiar ba!" <sup>30</sup>Sira nia matan nakloke. Jesus hateten ba sira ho lia maka'as; "Keta fo hatene buat ne'e ba ema ida." <sup>31</sup>Maibe, sai tiha, sira halo Nia naran boot iha rai ne'ebá tomak.

<sup>32</sup>Sira foin sai tiha, ema lori ba Nia ema monok ida ho diabu iha laran. <sup>33</sup>Jesus duni sai diabu no ema monok ne'e koaliala ona. Ema lubun hakhodak hodi dehan: "Ema ida seidauk hare buat ruma hanesan ne'e iha Israel." <sup>34</sup>Maibe fariseu sira dehan: "Hodi diabu sira nia ulun mak Nia duni sai diabu sira."

#### **To'os boot, maibe to'os atan uitoan**

<sup>35</sup>Jesus la'o lemo sidade ho knua sira hodi hanorin iha sinagoga sira no haklaken liafoun diak reinu nian; fo mos isin diak ba ema moras sira no ba sira hotu ne'ebé terus. <sup>36</sup>Hare tiha ema lubun boot, Nia hanoin teb-tebes sira, basa sira kole no neon nakraik, hanesan bibi sira ne'ebé bibi-atan la iha. <sup>37</sup>Tan ne'e Nia dehan ba eskolante sira: "To'os boot duni, maibe to'os atan uitoan. <sup>38</sup>Ne'e duni imi harohan ba to'os na'in atu haruka to'os atan sira ba nia to'os."

### **10**

#### **Jesus fihir apostolu sira hodi fo knaar ba sira**

<sup>1</sup>Nia bolu nia eskolante sira na'in sanulu resin rua hodi fo kbiit ba sira atu duni sai espiritu foer sira, no mos atu fo isin diak ba sira hotu ne'ebé terus moras oi-oin. <sup>2</sup>Apostolu sira naran mak ne'e: ida uluk, Simao ne'ebé hanaran Pedro, ho nia alin Andre; Tiago, Zebedeu nia oan, ho nia alin Joao; <sup>3</sup>Filipe ho Bartolomeu, Tome ho Mateus Publikanu, Tiago, Alfeu nia oan, ho Tadeu, <sup>4</sup>Simao Kananeu ho Judas Iscariotes, ne'ebé saran Nia ba mate.

<sup>5</sup>Jesus haruka ema na'in sanulu resin rua ne'e ba hodi hanorin uluk sira dehan: "Imi keta tuir gentiu sira nia dalan, keta tama iha Samaritanu sira nia sidade, <sup>6</sup>maibe imi buka uluk bibi sira ne'ebé lakon husi Israel nia uma-kain. <sup>7</sup>Imi haklaken tuir dalan katak reinu lalehan besik ona. <sup>8</sup>Imi halo moras sira hetan isin diak, halo mate sira moris fali, halo moras lepra sira sai mos, duni sai diabu sira. Imi simu la sosa, fo mos keta hein ema selu imi. <sup>9</sup>Keta lori osan mean, osan mutin eh osan riti iha imi nia futukabun. <sup>10</sup>La bele lori kohe tuir dalan, hena tahan rua, sandalis, eh ai-tonka; basa serbisu na'in soi atu simu nia kolen. <sup>11</sup>Wainhira imi tama iha sidade ka knua ruma, imi husu lai ema se mak diak hodi hela iha ne'ebá to'o imi fila. <sup>12</sup>Wainhira imi tama iha uma ida, imi kumprimenta uluk hodi dehan: "Dame ba uma ne'e." <sup>13</sup>Uma ne'e diak karik, imi nia dame sei tun ba sira; maibe ema la diak karik hodi la rona imi nia liafuan, imi sai husi uma ka sidade ne'e hodi liki rai rahun husi imi nia ain. <sup>15</sup>Ha'u dehan lialos ba imi katak, iha loron tesi lia nian, rai Sodoma no Gomorra sira nia kastigu sei la dun todan hanesan sidade ne'e nian."

#### **Apostolu sira sei hetan susar**

<sup>16</sup>"Ha'u haruka imi ba hanesan bibi sira iha asu fuik sira leet. Ne'e duni, imi neon na'in no matan moris ba hanesan samea sira, no mos laran diak hanesan manu falur sira. <sup>17</sup>Imi matan moris ho ema sira. Sira sei lori imi ba tribunal hodi baku imi iha sira nia sinagoga. <sup>18</sup>Sira sei lori imi hodi kesar imi ba emboot no liurai sira tamba Ha'u atu imi fo sasin iha sira oin no gentiu sira oin. <sup>19</sup>Maibe wainhira sira saran imi, imi laran keta susar kona ba buat sa ida imi atu dehan, eh atu koaliala los oin sa; iha oras ne'ebá sei haraik ba imi atu dehan sa ida. <sup>20</sup>La'os imi mak sei koaliala, maibe imi Aman nia Espiritu mak sei koaliala iha imi. <sup>21</sup>Maun sei saran nia alin ba mate, aman sei saran nia oan; oan sira sei foti liman hasouru aman sira hodi oho sira. <sup>22</sup>Ema hotu sei odi imi tan ha'u nia naran; maibe ema ne'ebé hela metin to'o rohan sei hetan rahun diak. <sup>23</sup>Wainhira ema duni imi sidade ida, imi ba sidade seluk. Basa Ha'u dehan ba imi katak molok imi liu husi sidade hotu Israel nian, Oan Mane sei mai ona. <sup>24</sup>Eskolante la bele boot liu mestre, atan la bele boot liu na'i. <sup>25</sup>To'o ona ba eskolante ida sai hanesan nia mestre, no mos ba atan sai hanesan nia na'in. Ema hanaran uma na'in Beelzebu, oin sa liu tan mak sira sei hanaran sira ne'ebé hela iha nia uma! <sup>26</sup>Ne'e duni, imi keta tauk sira, basa la iha buat ne'ebé subar hela ne'ebé ema sei la hatene. <sup>27</sup>Buat ne'ebé Ha'u dehan ba imi iha nakukun laran, imi fo sai iha naroman; buat ne'ebé imi rona sub-subar deit, imi haklaken husi uma nia kakuluk leten."

#### **Tauk deit Maromak**

<sup>28</sup>"Imi keta tauk ema sira ne'ebé oho isin lolon, maibe la bele oho klamar. Maibe imi sei tauk ida ne'ebé bele halo aat isin no klamar hotu iha ahi laran. <sup>29</sup>Manu oan rua la fa'an ba doit ida? Maibe sira ida la monu ba rai wainhira imi aman la husik. <sup>30</sup>Imi nia fuuk iha ulun sura hotu. <sup>31</sup>Ne'e duni, imi keta tauk, basa imi folin liu manu oan barak."

<sup>32</sup>"Ema ida fo sasin karik kona ba Ha'u iha ema seluk nia oin, Ha'u mos sei sasin kona ba nia iha ha'u Aman nia oin. <sup>33</sup>Maibe ida ne'ebé nega Ha'u iha ema nia oin, Ha'u mos sei nega nia iha ha'u Aman ne'ebé iha lalehan nia futar oin."

<sup>34</sup>"Imi keta hanoin katak Ha'u mai rai atu lori dame; Ha'u mai atu lori, la'os dame, maibe surik. <sup>35</sup>Basa Ha'u mai atu haketak oan mane husi nia aman, oan fetu husi nia inan no fetu foun husi nia banin fetu, <sup>36</sup>hodi halo ema nia parenti sira rasik sai ninia funu balun. <sup>37</sup>Ema ne'ebé hadomi nia aman ka nia inan liu fali Ha'u, nia la soi atu hela ho Ha'u. <sup>38</sup>Ema ne'ebé la lori nia krus hodi tuir ha'u, nia la soi Ha'u. <sup>39</sup>Ema ne'ebé hadomi nia moris, sei lakon nia; no ema ne'ebé lakon nia moris tamba Ha'u, sei hetan fali nia."

<sup>40</sup>"Ema ne'ebé simu imi, simu ha'u. Ema ne'ebé simu Ha'u, simu ida ne'ebé haruka Ha'u mai. <sup>41</sup>Ema ne'ebé simu profeta ida tan nia profeta, ema ne'e sei simu kolen profeta nian. Ema ne'ebé simu ema los ida tan nia ema los, ema ne'e sei simu kolen ema los nian. <sup>42</sup>Ema ne'ebé fo hemu kiik oan sira ne'e ida, maski be malirin kopu ida deit, tan nia Ha'u eskolante, Ha'u dehan lialos ba imi; nia sei la lakon nia kolen."

### **11**

#### **Jesus hahi Joao Baptista**

<sup>1</sup>Wainhira Jesus hanorin tiha nia eskolante na'in sanulu resin rua, Nia sai husi ne'ebá atu ba hanorin no haklaken iha sira nia sidade sira. <sup>2</sup>Iha kadeia laran, Joao rona kona ba Jesus nia hahalok sira no nia haruka nia eskolante na'in rua atu husu ba Nia: <sup>3</sup>"Ita mak ida ne'ebé atu mai, ka ami sei hein ema seluk?"

<sup>4</sup>Jesus hatan ba sira: "Imi haktuir ba Joao buat ne'ebé imi hare no rona: <sup>5</sup>Matan delek sira hare; ain kudeik sira la'o; ema moras lepra sira sai mos; tilun diuk sira rona; mate sira moris fali; Liafoun Diak haklaken ba kiak sira: <sup>6</sup>no rahun diak ba ema ne'ebé la lakon fiar iha Ha'u."

<sup>7</sup>Wainhira sira ba tiha ona, Jesus hahu koaliala ba ema lubun kona ba Joao, dehan: "Imi ba hare sa ida iha rai fuik maran? Fafulu ruma ne'ebé anin doko? <sup>8</sup>Imi ba hare sa ida? Ema ida hatais hena mesa furak? Maibe ema sira ne'ebé hatais hena furak hela iha liurai nia kadunan. <sup>9</sup>Ne'e duni, imi ba hare sa ida? Profeta ida karik? Los duni, Ha'u dehan ba imi, liu fali profeta ida. <sup>10</sup>Kona ba nia mak hakerek tiha ona: 'Ha'u haruka ha'u nia manu ain atu ba o nia oin hodi hadia dalan ba o.' <sup>11</sup>Ha'u dehan lialos ba imi: husi ema sira ne'ebé moris husi fetu la iha ida boot liu Joao Baptista; maibe ida ne'ebé kiik liu iha reinu lalehan, boot liu nia. <sup>12</sup>Houri Joao Baptista nia loron to'o ohin, ema hadau malu reinu lalehan; sira ne'ebé haka'as an liu mak manan nia. <sup>13</sup>Basa ukunfuan no profeta sira si'ik to'o Joao. <sup>14</sup>Imi hakarak fiar karik, nia mak Elias ne'ebé atu mai. <sup>15</sup>Ema ne'ebé tilun iha atu rona, rona ba!"

#### **Ema hakribi Joao no mos Jesus**

<sup>16</sup>"Ha'u sei tanasan ema derasaun ne'e nian ho se los? Sira hanesan labarik sira ne'ebé tur iha prasa, koaliala ba malu, <sup>17</sup>dehan: 'Ami hakhuit ba imi, imi la bidu; ami hananu babenon, imi la tanis.' <sup>18</sup>Joao Baptista mai, la han la hemu, sira dehan: 'Nia diabu tama laran.' <sup>19</sup>Oan Mane mai, han hemu, sira dehan: 'Nia kaanten, lanuten, publikanu no maksalak sira belun!' Maibe matenek hatudu an lo-los hodi ninia hahalok sira."

#### **Sidade aat sira sei hetan kastigu**

<sup>20</sup>Ho ne'e, Nia hahu koaliala hasouru sidade sira iha ne'ebé Nia halo ona milagre barak liu, tan sira la halo penitensia. <sup>21</sup>"Susar ba o, Korozaim! Susar ba o, Betsaida! Basa milagre sira ne'ebé halo ona iha imi leet, halo tiha karik iha Tiro no Sidon, kleur tiha ona mak sira hakribi sala hodi karon no ahi-kdesan. <sup>22</sup>Tan ne'e, Ha'u dehan ba imi katak iha loron justisa nian imi sei hetan todan liu fali Tiro no Sidon. <sup>23</sup>O fali, Kafarnaum, hakarak foti an to'o lalehan? O sei monu to'o inferno! Basa milagre sira ne'ebé halo ona iha o, halo tiha karik iha Sodoma, to'o ohin Sodoma sei hamriik hela. <sup>24</sup>Tan ne'e, Ha'u dehan ba imi katak iha loron justisa nian o sei hetan todan liu Sodoma ninian."

## Jesus ho Aman

<sup>25</sup>Iha oras ne'ebá Jesus harohan, dehan: "Aman, lalehan no rai nia Na'i, Ha'u hahi Ita tan Ita subar tiha buat hirak ne'e ba matenek no neon na'in sira hodi hatudu ba kiik oan sira. <sup>26</sup>Los duni, Aman, tan ida ne'e duni mak Ita hakarak. <sup>27</sup>Ha'u Aman tau tiha buat hot-hotu iha ha'u liman; ema ida la hatene Oan, Aman deit mak hatene; nune'e mos ema ida la hatene Aman, Oan mak hatene, no mos ema ne'ebé Oan hakarak hatudu ba nia."

<sup>28</sup>"Mai besik Ha'u, imi hotu ne'ebé kole no terus; Ha'u sei fo kmaan ba imi. <sup>29</sup>Imi simu ha'u nia ukun ba hodi banati tuir Ha'u, tan Ha'u laran kmaus no haraik an; no imi sei hetan kmaan ba imi nia kllamar. <sup>30</sup>Basa ha'u nia ukun mamar, ha'u nia naha kmaan."

## 12

### Silu batar, fo isin diak iha loron Sabadu

<sup>1</sup>Iha loron Sabadu ida Jesus liu husi to'os batar ida. Nia eskolante sira hamlaha; tan ne'e sira hahu silu batar hodi han. <sup>2</sup>Hare tiha ne'e, fariseu sira dehan ba Nia: "O nia eskolante sira halo dau-daun buat ne'ebé bandu atu halo iha loron Sabadu!" <sup>3</sup>Nia hatan ba sira: "Imi la lee buat ne'ebé David halo, wainhira nia hamlaha. Nia ho sira ne'ebé hamutuk ho nia? <sup>4</sup>Oin sa nia tama iha Maromak nia uma hodi han paun sakrifisiu nian, ne'ebé nia no mos sira ne'ebé hamutuk ho nia la bele han; am'lulik sira iha deit mak bele? <sup>5</sup>Imi seidauk lee iha Ukunfuan katak am'lulik sira iha Templu la halo tuir Sabadu, no sira la hetan sala? <sup>6</sup>Maibe Ha'u dehan ba imi katak iha ne'e iha Ida ne'ebé boot liu Templu. <sup>7</sup>Imi hatene karik lia ne'e katak sa, 'Ha'u hakarak laran luak liu fali sakrifisiu,' imi sei la fo todan ba sira ne'e ne'ebé sala laek. <sup>8</sup>Basa Oan Mane mos Sabadu nia na'in."

<sup>9</sup>Husi ne'ebá Nia liu ba sinagoga. <sup>10</sup>Iha ne'ebá iha ema ida ho liman maran. Sira husu ba Nia: "Bele fo isin diak ba ema moras iha loron Sabadu, ka lae?" Sira husu ne'e atu bele dun Nia. <sup>11</sup>Maibe Nia husu ba sira: "Imi sira ne'e se mak iha karik bibi ida ne'ebé monu ba rai kuak iha loron Sabadu, la ba buka nia hodi dada sai? <sup>12</sup>Maibe, ema ida la folin liu bibi ida? Ne'e duni, bele halo diak iha loron Sabadu." <sup>13</sup>Hafoin Nia dehan ba ema moras: "Lolo o nia liman!" Nia lolo nia liman moras no liman ne'e sai diak hanesan ida seluk. <sup>14</sup>Sai tiha ba liur, fariseu sira tesi lia hasouru Nia, halo oin sa atu halakon Nia.

### Jesus, Maromak nia Atan

<sup>15</sup>Tan hatene ne'e, Jesus hadook An tiha husi ne'ebá. Ema barak tuir Nia. Ba sira hotu Nia fo isin diak, <sup>16</sup>hodi hameno ba sira atu keta fo sai ba ema ida. <sup>17</sup>Nune'e sai tuir duni buat ne'ebé profeta Isaías dehan nanis: <sup>18</sup>"Ha'u nia atan mak ne'e, ne'ebé Ha'u fihir, ha'u nia doben. Iha Nia Ha'u haksolok teb-tebes. Ha'u sei haraik ha'u nia Espiritu ba Nia, Nia sei haklaken fiar los ba nasaun sira. <sup>19</sup>Nia sei la haksasuk, sei la hakilar; ema ida sei la rona nia lia iha luron sira. <sup>20</sup>Nia sei la silu tohar tan fafulu ne'ebé tohar ona, sei la hu'u mate ahi-oan ne'ebé suar, sei haka'as an atu halo justisa manan. <sup>21</sup>Nasaun sira sei tau laran metin ba Nia."

### Jesus ho diabu

<sup>22</sup>Tuir mai, sira lori ba Nia ema matan delek no monok ida ne'ebé diabu tama iha laran. Jesus bali nia hodi halo nia koalía no hare. <sup>23</sup>Ema hotu hakfodak, dehan: "Ema ne'e kala mak David nia Oan." <sup>24</sup>Maibe, rona tiha ne'e, fariseu sira dehan: "Nia duni sai diabu sira hodi Beelzebu, diabu sira nia ulun."

<sup>25</sup>Tan hatene sira nia hanoin, Jesus hatan ba sira: "Reinu ne'ebé fahe an hodi funu hasouru nia an, reinu ne'e sei mohu. Sidade ka uma-kain ne'ebé fahe an hodi funu hasouru nia an rasik sei la hamriik metin. <sup>26</sup>Ne'e duni Satanas duni sai karik Satanas, nia fahe an hodi funu hasouru nia an rasik: oin sa mak nia reinu bele hamriik metin? <sup>27</sup>Ha'u duni sai karik diabu hodi Beelzebu hodi se los mak imi nia ema sira duni sai diabu sira? Tan ne'e, sira rasik mak sei tesi lia hasouru imi. <sup>28</sup>Maibe, Ha'u duni sai karik diabu sira hodi Maromak nia Espiritu, ne'e dehan katak Maromak nia reinu to'o ona iha imi leet. <sup>29</sup>Eh oin sa ema ida bele tama iha ema maka'as nia uma atu na'ok nia rikusoí, wainhira nia la futu lai ema ne'e? Nune'e deit mak nia bele na'ok husi ema ne'e nia uma."

<sup>30</sup>"Ema ne'ebé la hamutuk ho Ha'u, nia hasouru Ha'u; no ema ne'ebé la hamutuk ho Ha'u, nia sei namkari"

### Lia aat hasouru Espiritu Santu

<sup>31</sup>"Tan ne'e Ha'u dehan ba imi: Sala hotu no lia aat hotu hasouru Maromak sei simu perduá. <sup>32</sup>Ema ruma hateten karik lia hasouru Oan Mane, nia sei hetan perduá. Maibe ema ne'ebé koalía hasouru Espiritu Santu, nia sei la hetan perduá iha mundu ne'e no mos iha mundu seluk. <sup>33</sup>Ai-hun diak fo fuan diak, ai-hun aat fo fuan aat: ema hatene ai husi nia fuan. <sup>34</sup>Imi samodok oan sira! Oin sa mak imi bele koalía buat diak, imi ne'ebé aat? Basa ibun fakar sai buat ne'ebé rai hela iha laran. <sup>35</sup>Ema ne'ebé diak lori sai buat diak husi nia laran diak, maibe ema aat fakar sai buat aat husi nia laran aat. <sup>36</sup>Ha'u dehan ba imi katak ema sira sei hatan iha loron justisa nian kona ba lia folin laek hotu ne'ebé sira dehan. <sup>37</sup>Basa, tuir o nia liafuan sira mak o sei hetan kolen eh kastigu."

### Sinal Jonas nian

<sup>38</sup>Iha oras ne'e eskriba no fariseu balun dehan ba Nia: "Mestre, ami hakarak hare sinal ida husi Ita." <sup>39</sup>Nia hatan ba sira: "Ema laran aat husu sinal ida; maibe sei la fo sinal ida ba nia; sei fo deit sinal profeta Jonas nian. <sup>40</sup>Hanesan Jonas hela iha ikan boot nia kabun laran loron tolu no kalan tolu, nune'e mos Oan Mane sei hela iha rai laran loron tolu no kalan tolu. <sup>41</sup>Iha loron justisa nian, ema Ninive sira sei hamriik hasouru derasaun ne'e hodi tesi lia ba nia, basa sira halo penitensia wainhira sira rona Jonas nia liafuan; maibe iha ne'e iha Ida ne'ebé boot liu fali Jonas. <sup>42</sup>Iha loron justisa nian, liurai feto reinu tasi mane nian sei hamriik hasouru derasaun ne'e hodi tesi lia ba nia, basa nia mai husi rai ikun atu rona Salomao nia matenek; maibe iha ne'e iha Ida ne'ebé boot liu fali Salomao!"

### Diabu fila fali

<sup>43</sup>"Wainhira espiritu foer sai husi ema ida, nia la'o lemo rai fuik maran hodi buka hakmatek, maibe nia la hetan. <sup>44</sup>Tuir mai nia dehan: 'Ha'u sei fila fali ba uma ne'ebé ha'u husik tiha.' To'o tiha ne'ebá, nia hetan uma mamuk, sar mos no aruma di-diak hela. <sup>45</sup>Tuir mai nia ba lori espiritu hitu seluk ne'ebé aat liu fali nia. Sira tama iha uma laran hodi hela iha ne'ebá, halo ema ne'e sai aat liu uluk."

### Jesus nia parenti los

<sup>46</sup>Nia sei koalía dau-daun ba ema lubun boot wainhira nia inan ho nia maun alin sira to'o mai iha liur hodi buka atu koalía ho Nia. <sup>47</sup>Ema ida dehan ba Nia: "Ita nia inan no ita nia maun alin sira hakarak koalía ho Ita". <sup>48</sup>Jesus hatan ba ida ne'ebé koalía ba Nia: "Se mak ha'u nia inan, se mak ha'u nia maun alin sira?" <sup>49</sup>Hafoin Nia lolo liman ba nia eskolante sira hodi dehan: "Sira ne'e mak ha'u nia inan no ha'u nia maun alin sira. <sup>50</sup>Basa ema hotu ne'ebé halo tuir ha'u Aman lalehan nia hakarak, ema ne'e mak ha'u nia maun, ha'u nia feton no ha'u nia inan."

## 13

### Aiknanoik kona ba ema ne'ebé kuda fini

<sup>1</sup>Iha loron hirak ne'ebá Jesus sai husi uma hodi tur iha tasi ibun. <sup>2</sup>Ema barak teb-tebes mai hale'u Nia; tan ne'e Nia tur iha ro ida nia laran, ema lubun boot tur iha tasi ibun. <sup>3</sup>Nia hanorin buat barak ba sira ho aiknanoik, dehan: "To'os na'in ida ba kuda to'os. <sup>4</sup>Nia kuda dau-daun, fini balun monu iha dalan ninin, manu sira mai han. <sup>5</sup>Fini seluk monu iha fatuk laran iha ne'ebé rai uitoan deit; sira ne'e moris kedas basa rai la dun klean; <sup>6</sup>maibe loron sa'e, sunu tiha sira tan abut la iha, hafoin sira sai maran. <sup>7</sup>Fini seluk monu iha ai-tarak klaran; ai-tarak sira moris mat, hanehan sira to'o mate. <sup>8</sup>Fini seluk monu iha rai diak hodi fo fuan: balun dala atus ida, seluk neen nulu; seluk fali tolu nulu. <sup>9</sup>Ema ne'ebé iha tilun, rona ba!"

<sup>10</sup>Eskolante sira hakbesik ba Nia, dehan: "Tansa Ita koalía ba sira ho aiknanoik? <sup>11</sup>Nia hatan ba sira: "Ba imi fo hatene misteriu sira reinu lalehan nian, maibe ba sira lae. <sup>12</sup>Basa ba ida ne'ebé iha ona, sei fo tan atu nia iha liu tan; maibe ba ida ne'ebé la iha, buat uitoan mos ne'ebé nia iha sei hasai tan. <sup>13</sup>Tan ne'e mak Ha'u koalía ba sira ho aiknanoik, basa sira hateke dau-daun, maibe sira la hare; sira se tilun dau-daun maibe la rona, ka hatene los. <sup>14</sup>Nune'e sei sai duni tuir Profeta Isaías nia lia ne'ebé dehan: 'Imi rona ho tilun, maibe la hatene los; imi hare ho matan, maibe la hare mos. <sup>15</sup>Basa povu ne'e nia laran tos; sira

nian tilun diuk no la bele rona; sira fuan la bele hatene los keta sira hakribi sira nia sala hafoin Ha'u halo sira fila ba diak. <sup>16</sup>Maibe rahun diak ba imi nia matan basa hare; no ba imi nia tilun basa rona. <sup>17</sup>Ha'u dehan lialos ba imi katak profeta no ema diak barak hakarak teb-tebes hare buat ne'ebé imi hare dau-daun, maibe la hare; no rona buat ne'ebé imi rona, maibe la rona."

<sup>18</sup>"Ne'e duni imi rona di-diak aiknanoik kona ba ema ne'ebé kuda to'os. <sup>19</sup>Fini ne'ebé monu iha dalan ninin hanesan ema ne'ebé rona liafuan reinu nian maibe la hatene lo-los. Ida ne'ebé aat mai hodi hasai buat ne'ebé kuda tiha iha nia laran, <sup>20</sup>Fini ne'ebé monu iha fatuk laran mak ida ne'ebé rona liafuan hodi simu kedas ho ksolok. <sup>21</sup>Maibe tan abut la iha, nia mate lalais; hetan tiha susar eh terus tamba liafuan, nia monu kedas. <sup>22</sup>Fini ne'ebé monu iha ai-tarak laran mak ida ne'ebé rona liafuan maibe knaar sira no rikusoi mundu ne'e nian hanehan liafuan ne'e; halo nia la fo fuan. <sup>23</sup>Fini ne'ebé monu iha rai diak mak ida ne'ebé rona liafuan hodi hanoin di-diak: ida ne'e fo fuan dala atus ida, ka neen nulu, ka tolu nulu."

#### **Aiknanoik du'ut aat nian**

<sup>24</sup>Nia dehan tan aiknanoik ida ba sira: "Reinu lalehan nian hanesan ema ida ne'ebé kuda fini diak iha nia to'os; <sup>25</sup>maibe wainhira nia emar sira toba dau-daun, nia funu balun mai kuda du'ut aat iha trigu leet, hafoin nia ba tiha. <sup>26</sup>Wainhira trigu sai boot tiha hodi fo fuan, du'ut aat mos mosu. <sup>27</sup>To'os na'in nia atan sira mai buka nia hodi dehan ba nia: 'Na'i, Ita la kuda fini diak iha ita nia to'os? Du'ut aat mai husi ne'ebé?' <sup>28</sup>Nia hatan: 'Ha'u nia funu balun ruma mak halo buat ne'e.' Atan sira dehan ba nia: 'Ita hakarak ami ba fokit tiha nia?'" <sup>29</sup>'Lae,' nia dehan, 'keta halo be hodi fokit du'ut aat, imi fokit mos trigu. <sup>30</sup>Imi husik sira rua moris hamutuk; laron ko'a hare nian to'o mai mak ha'u sei dehan ba to'os atan sira: 'Imi hili uluk mak du'ut aat hodi futu hamutuk atu sunu; trigu fali, imi halot iha ha'u nia hoka.'"

#### **Aiknanoik mustarda musan no fermentu nian**

<sup>31</sup>Jesus haktuir tan aiknanoik ida ba sira: "Reinu lalehan nian hanesan mustarda musan ida ne'ebé ema kuda iha nia to'os. <sup>32</sup>Musan ne'e kiik liu ai musan sira hotu; maibe boot mai, nia moris boot liu hotu, to'o sai ai-hun ne'ebé lalehan nia manu sira mai tur iha nia sanak sira."

<sup>33</sup>Nia dehan tan aiknanoik seluk ba sira: "Reinu lalehan nian hanesan fermentu ne'ebé feto ida kahur ho farina sasukat tolu, to'o nia sa'e di-diak."

<sup>34</sup>Buat ne'e hotu Jesus dehan ba ema lubun boot ho aiknanoik sira; la ho aiknanoik, Nia la koaliala ba sira. <sup>35</sup>Nune'e sai tuir duni buat ne'ebé uluk profeta dehan: "Ha'u sei loke ha'u ibun ho aiknanoik, Ha'u sei haklaken buat sira ne'ebé susar houri mundu hahu."

<sup>36</sup>Tuir mai, husik tiha ema lubun boot ne'e, Jesus ba fali uma. Nia eskolante hakbesik ba Nia hodi dehan: "Hanorin mai ami aiknanoik kona ba du'ut aat iha to'os." <sup>37</sup>Nia hatan ba sira: "Ida ne'ebé kuda fini diak, ne'e Oan Mane. <sup>38</sup>To'os mak mundu. Fini diak mak reinu nia oan sira. <sup>39</sup>Funubalu ne'ebé kuda fini aat mak diabu. Laron ko'a nian mak laron ikus mundu ne'e nian. Sira ne'ebé ko'a mak anju sira. <sup>40</sup>Ne'e duni, hanesan sira futu du'ut aat hodi sunu iha ahi, nune'e mos sei mosu wainhira mundu sei to'o nia rohan. <sup>41</sup>Oan Mane sei haruka nia anju sira atu hasa'e tiha husi nia reinu sira hotu ne'ebé fo esemplu aat no sira hotu ne'ebé halo aat, <sup>42</sup>hodi soe sira ba ahi lakan iha ne'ebá sira sei tanis no ruun nehan. <sup>43</sup>Ema diak sira sei nabilan hanesan laron iha sira Aman nia reinu. Ema ne'ebé tilun iha, rona ba!"

#### **Aiknanoik osan mean, fatuk murak no dai nian**

<sup>44</sup>"Reinu lalehan nian hanesan murak ida ne'ebé subar hela iha to'os laran, ne'ebé ema ida hetan hodi haksumik fali. Ho ksolok boot nia fa'an buat hotu ne'ebé nia iha hodi sosa to'os ne'e."

<sup>45</sup>"Reinu lalehan nian hanesan kontratu na'in ida ne'ebé buka murak diak sira. <sup>46</sup>Hetan tiha ida ne'ebé folin boot, nia fa'an tiha buat hotu ne'ebé nia iha hodi sosa murak ne'e."

<sup>47</sup>"Reinu lalehan nian hanesan rede ida ne'ebé ema soe ba tasi hodi dada ikan sira, kiik no boot. <sup>48</sup>Nia nakonu ona, kail na'in sira dada ba tasi ibun; tur tiha, sira hili ikan diak sira tau hamutuk iha lafatik, sira ne'ebé aat soe tiha. <sup>49</sup>Sei sai nune'e mos wainhira mundu to'o nia rohan: anju sira sei mosu hodi haketak ema aat sira hodi ema diak sira. <sup>50</sup>Hafoin sira sei soe ema aat sira ba ahi lakan manas: iha ne'ebá sira sei tanis no ruun nehan."

<sup>51</sup>"Imi rona los buat hirak ne'e hotu?" Sira hatan: "Ami rona." <sup>52</sup>Nia dehan tan ba sira: "Tan ne'e, eskriba sira ne'ebé matenek kona ba reinu lalehan nian hanesan aman ida ne'ebé hasai buat foun no tuan husi nia rikusoi."

#### **Ema Nazare sira la simu Jesus**

<sup>53</sup>Hanorin hotu tiha ho aiknanoik sira ne'e, Jesus husik rai ne'ebá. <sup>54</sup>To'o tiha ninia rai, Nia hanorin iha sinagoga, halo ema hotu hakfodak hodi dehan: "Nia matenek ho nia kbiit hodi halo milagre hirak ne'e mai los husi ne'ebé?" <sup>55</sup>Nia la'os badaen ai nia oan? Nia inan la naran Maria, no mos nia maun alin la naran Tiago, Jose, Simao ho Judas? <sup>56</sup>Nia feton la hela hamutuk ho ita? Ne'e duni, buat hirak ne'e hotu, Nia hetan los husi ne'ebé?" <sup>57</sup>No sira lakohi simu Nia. Maibe Jesus dehan ba sira: "Ema hanai profeta ida iha fatin hotu; iha nia rai deit no iha nia uma mak ema hewai nia." <sup>58</sup>Nia la halo milagre barak iha ne'ebá, tan ema sira ne'ebá la fiar.

### **14**

#### **Joao Baptista nia mate**

<sup>1</sup>Iha tempu ne'ebá liurai Herodes rona kona ba Jesus nia naran boot. <sup>2</sup>Herodes dehan ba nia ema sira: "Tebes, ema ne'e Joao Baptista ne'ebé moris fali ona! Tan ne'e nia iha kbiit atu halo milagre sira."

<sup>3</sup>Herodes kaer duni Joao hodi futu no hatama nia iha kadeia tamba Herodiade, nia maun Filipe nia kaben; <sup>4</sup>basa Joao dehan ba nia: "O la bele hola nia." <sup>5</sup>Herodes hakarak oho Joao maibe nia tauk povu ne'ebé hare Joao nudar profeta. <sup>6</sup>Maibe iha laron ne'ebé Herodes halo tinan, Herodiade nia oan feto dansa iha ema hotu nia oin hodi fo ksolok ba Herodes. <sup>7</sup>Tan ne'e Herodes hakotu lia ho juramentu atu fo ba fetoran ne'e buat hotu ne'ebé nia husu. <sup>8</sup>Rona tiha nia inan, nia hatan: "Fo mai ha'u Joao Baptista nia ulun iha bikan boot ida." <sup>9</sup>Liurai neon susar, maibe tamba nia jura iha bainaka sira oin, <sup>10</sup>nia haruka ema atu tesi Joao nia ulun iha kadeia hodi lori mai. <sup>11</sup>Sira lori ulun mai iha bikan ida hodi fo ba fetoran ne'ebé fo fali ba nia inan. <sup>12</sup>Joao nia eskolante sira mai foti nia isin hodi ba hakoi; hafoin sira ba fo hatene ba Jesus.

#### **Jesus fo han ba ema barak**

<sup>13</sup>Rona tiha buat ne'e, Jesus sa'e ba ro ida hodi ba mesak iha fatin dook ida; maibe hatene tiha ne'e, ema lubun boot husik sidade sira hodi la'o tuir Nia. <sup>14</sup>Tun husi ro hodi hare ema barak ne'e, Jesus hanoin teb-tebes sira hodi fo isin diak ba sira ne'ebé moras. Loraik dau-daun ona, eskolante sira hakbesik ba Nia hodi dehan: <sup>15</sup>Fatin ne'e rai fuik, oras loraik ona; haruka ema sira ne'e ba ona, atu sira ba sosa aihan iha knua sira." <sup>16</sup>Jesus dehan ba sira: "Sira lalika ba; imi fo han sira." <sup>17</sup>Sira hatan ba Nia: "Iha ne'e ami iha deit paun fuan lima no ikan rua." <sup>18</sup>"Imi lori sira mai," Nia dehan. <sup>19</sup>Hafoin Nia haruka ema lubun boot tur iha du'ut leten. Nia kaer paun fuan lima no ikan rua ne'e, foti matan ba lalehan hodi fo bensa. Tuir mai Nia silu paun sira ne'e hodi fo ba eskolante sira; hafoin sira fo fali ba ema lubun boot. <sup>20</sup>Sira hotu han to'o bosu; baluk sira ne'ebé resin, sira tau ba luhu sanulu resin rua nakonu! <sup>21</sup>Ema sira ne'ebé han hamutuk mane rihun lima, la sura labarik no feto sira.

#### **Jesus la'o iha be leten**

<sup>22</sup>Tuir mai Jesus haruka eskolante sira sa'e ro hodi ba uluk tasi sorin ba, wainhira Nia despede ema lubun. <sup>23</sup>Despede tiha sira, Nia sa'e ba foho atu harohan mesa-mesak. To'o kalan, Nia mesak deit iha ne'ebá. <sup>24</sup>Ro iha ona tasi klaran, laloran baku maka'as, basa anin hu'u hasouru. <sup>25</sup>To'o kalan fahe ba hat, Jesus hakbesik ba sira hodi la'o iha tasi leten. <sup>26</sup>Hare tiha Nia la'o iha tasi leten, eskolante sira hakfodak hodi dehan: "Rai na'in ida!" Sira hakilar ho tauk. <sup>27</sup>Jesus koaliala kedas ba sira, dehan: "Hakmatek ba! Ne'e mak Ha'u: imi keta tauk!" <sup>28</sup>Pedro hatan, dehan: "Na'i, Ita Boot mak ne'e karik, haruka ha'u ba to'o Ita husi be leten." Jesus simu: "Mai!" <sup>29</sup>Pedro tun husi ro hodi la'o iha be leten atu ba to'o Jesus. <sup>30</sup>Maibe, hare anin hu'u maka'as, nia tauk hodi hahu mout. Nia hakilar. "Na'i, soi ha'u!" <sup>31</sup>Jesus lolo liman ba nia hodi kaer nia, dehan: "Ema fiar kiik, tansa o laran rua-rua?" <sup>32</sup>Sira tama tiha ba ro laran, anin kmaus tiha.

<sup>33</sup>Sira ne'ebé iha ro laran monu iha Jesus nia oin hodi dehan: "Tebes duni, Ita Boot mak Maromak." <sup>34</sup>Hakur tiha tasi, sira tun ba rai Genesare. <sup>35</sup>Hatene tiha Nia, ema sira rai ne'ebá nian ba fo hatene ba maluk sira iha fatin hotu. Sira lori ba Nia moras sira hotu, <sup>36</sup>hodi husu ba Nia atu husik netik sira kona nia tais ninin. No sira ne'ebé kona duni, hetan isin diak.

## 15

### Lisan sira

<sup>1</sup>Iha loron ne'ebá fariseu no eskriba balun husi Jerusalem mai koalita ba Jesus, dehan: <sup>2</sup>"Tansa mak ita nia eskolante sira la tuir lisan bei-ala sira nian?" Basa sira la fase liman molok atu han." <sup>3</sup>Nia hatan ba sira: "Imi fali, tansa imi hasouru Maromak nia ukunfuan tan deit imi nia lisan? <sup>4</sup>Basa Maromak dehan: 'Hantaunk aman inan', no mos: 'Ema ne'ebé fo malisan ba aman ka inan, nia sei mate.' <sup>5</sup>Maibe imi dehan, 'Ema ne'ebé dehan ba nia aman ka nia inan: 'Riku soi ne'ebé ha'u bele usa atu tulun o, ne'e buat karan santu', <sup>6</sup>ema ne'e la iha ona obrigasaun atu tulun aman inan. 'Nune'e imi hewai Maromak nia futar lia tan imi nia lisan. <sup>7</sup>Laran makerek sira! Profeta Isaías si'ik kona ba imi wainhira nia dehan: <sup>8</sup>'Povu ida ne'e hahi Ha'u ho ibun tutun, maibe nia laran dook husi Ha'u. <sup>9</sup>Sira adora Ha'u leet deit hodi hanorin deit ema sira nia doutrina no ukunfuan sira."

<sup>10</sup>Tuir mai Nia bolu ema lubun boot hodi dehan ba sira: "Imi rona di-diak hodi buka hatene! <sup>11</sup>La'os buat ne'ebé tama husi ibun mak hafoer ema, maibe buat ne'ebé sai husi ibun mak halo ema foer."

<sup>12</sup>Eskolante sira hakbesik hodi dehan ba Nia: "Ita hatene katak fariseu sira hirus wainhira sira rona Ita koalita nune'e?" <sup>13</sup>Nia hatan ba sira: "Ai hotu ne'ebé la'os Ha'u Aman lalehan mak kuda, sei fokit tiha. <sup>14</sup>Imi husik ema sira ne'e; sira hanesan matan delek sira ne'ebé hatudu dalan ba matan delek sira seluk, sira na'in rua sei monu hotu iha rai kuak."

<sup>15</sup>Pedro hatan hodi dehan ba Nia: "Hanorin aiknanaok mai ami." <sup>16</sup>Jesus dehan ba sira: "Imi neon mos seidaunk nakloke? <sup>17</sup>Imi la hatene katak buat ne'ebé tama husi ibun liu ba kabun, hafoin sai fali ba liur? <sup>18</sup>Maibe buat ne'ebé sai husi ibun mai husi laran, ne'e mak halo foer. <sup>19</sup>Husi laran suli mai hanoin aat sira, oho ema, sala hasouru kaben, sala foer, na'ok, bobar lia falsu, hateten aat Maromak. <sup>20</sup>Ne'e hotu mak hafoer ema; maibe la fase liman, ne'e la hafoer ema."

### Feto husi Kanaan

<sup>21</sup>Sai tiha husi ne'ebá, Jesus liu ba rai Tiro no Sidon nian. <sup>22</sup>Iha oras ne'ebá feto Kanaan ida ne'ebé mai husi rai ne'ebá hahu hakilar: "Na'i, David nia Oan, hanoin ha'u: diabu fo terus boot ba ha'u nia oan feto." <sup>23</sup>Maibe Nia la hatan lia fuan ida. Eskolante sira hakbesik ba Nia hodi husu: "Hatan tiha ba nia ba, basa nia hakilar bei-beik tur ita." <sup>24</sup>Nia hatan: "Ha'u mai deit ba bibi sira ne'ebé lakon husi uma-kain Israel nian." <sup>25</sup>Maibe feto ne'e mai hakneak iha Nia oin, dehan: "Na'i, tulun ha'u!" <sup>26</sup>Nia simu: "Hala oan sira nia aihan hodi soe ba asu oan sira la diak!" <sup>27</sup>Feto ne'e dehan fali: "Ne'e los duni, Na'i; maibe asu oan sira mos han etu mumun ne'ebé monu husi sira na'in nia mesa." <sup>28</sup>Jesus hatan ba nia: "Feto, o nia fiar boot tebes! Halo duni tuir o hakarak." Iha oras ne'ebá, nia oan feto hetan fali isin diak.

### Fo isin diak ba ema moras barak

<sup>29</sup>Sai tiha husi ne'ebá, Jesus liu ba to'o tasi Galilea. Nia sa'e ba foho ida hodi tur iha ne'ebá. <sup>30</sup>Ema barak mai buka Nia. Sira lori ema ain aat sira, ema moras sira, matan delek sira no monok sira, ho tan sira barak seluk hodi tau sira iha nia ain; no Jesus fo isin diak ba sira. <sup>31</sup>Ne'e halo ema lubun boot hakfodak wainhira sira hare monok sira koalita, moras sira diak fali, ain aat sira la'o los, matan delek sira hare mos. No sira hasa'e gloria ba Israel nia Maromak.

### Fo han ba ema barak

<sup>32</sup>Bolu tiha nia eskolante sira, Jesus dehan ba sira: "Ha'u hanoin ema lubun ne'e, basa loron tolu ona mak sira la tuir Ha'u, la han buat ida. Ha'u lakohi haruka sira ba la han buat ida. Keta sira monu iha dalan karik." <sup>33</sup>Eskolante sira dehan ba Nia: "Iha rai fuik ne'e, ita ba buka paun ne'ebé to'o atu fo han bosu ema barak hanesan ne'e iha los ne'ebé?" <sup>34</sup>Jesus husu ba sira: "Imi iha paun fuan hira?" Sira hatan: "Paun fuan hitu, ho ikan oan balun." <sup>35</sup>Jesus haruka ema lubun boot tur hotu iha rai, <sup>36</sup>kaer paun fuan hitu ho ikan sira, fo obrigadu, silu hodi fahe ba eskolante sira atu fo ba povu. <sup>37</sup>Sira hotu han to'o bosu. Hafoin sira tau baluk sira ne'ebé resin ba luhu hitu nakonu. <sup>38</sup>Ema sira ne'ebé han ne'e sura hamutuk mane rihun hat, la sura feto ho labarik sira. <sup>39</sup>Haruka tiha ema sira ba uma, Jesus sa'e ba ro hodi la'o ba rai Magadan.

## 16

### Sira husu sinal ida

<sup>1</sup>Ema fariseu no saduseu sira hakbesik ba Jesus atu koko Nia. Sira husu ba Nia atu hatudu ba sira sinal ida husi lalehan. <sup>2</sup>Nia hatan ba sira: "Iha kalan imi dehan: 'Tempu diak, basa lalehan mean.' <sup>3</sup>Iha dader, imi dehan: 'Ohin tempu la diak, basa lalehan mean nakukun.' Imi hatene si'ik tempu hodi hare lalehan nia oin; maibe imi la hatene si'ik sinal tempu sira nian. <sup>4</sup>Derasaan aat ho laran foer ne'e husu sinal ida, maibe sei la sinal ida ba nia; sei fo deit sinal Jonas nian." Tuir mai Nia husik sira hodi ba fatin seluk.

<sup>5</sup>Wainhira eskolante sira hakur tasi ba sorin, sira haluha atu lori paun. <sup>6</sup>Jesus dehan ba sira: "Imi matan moris, neon na'in ho fariseu no saduseu sira nia fermentu." <sup>7</sup>Sira hanoin hodi dehan ba malu: "Ne'e tan ita haluha lori paun." <sup>8</sup>Maibe, Jesus hatene ne'e, dehan: "Imi ema fiar namlele, tansa imi haksasuk malu tan imi la lori paun?" <sup>9</sup>Imi seidaunk hatene lo-los? Imi kala haluha ona paun fuan lima ne'ebé fo han ema rihun lima. Imi halibur resin sira iha luhu hira? <sup>10</sup>No mos paun fuan hitu ne'ebé fo han ema rihun hat. Imi tau resin sira iha luhu hira? <sup>11</sup>Nusa mak imi la hatene lo-los katak, wainhira Ha'u dehan ba imi 'matan moris neon na'in ho fariseu no saduseu sira nia fermentu', Ha'u la koalita kona ba paun?"

<sup>12</sup>Nune'e mak sira foin hatene katak Jesus husu atu sira souri an la'os hasouru fermentu paun nian, maibe hasouru fariseu no saduseu sira nia doutrina.

### Pedro nia fiar

<sup>13</sup>To'o tiha rai Sesareia Filipe nian, Jesus husu ba nia eskolante sira: "Ema sira dehan Oan Mane ne'e se los?" <sup>14</sup>Sira hatan; "Balun dehan katak Nia mak Joao Baptista, seluk katak Elias, seluk fali katak Jeremias ka profeta ruma." <sup>15</sup>Jesus dehan ba sira; "Imi fali dehan Ha'u se?" <sup>16</sup>Simao Pedro simu hodi dehan: "Ita Boot mak Kristu, Maromak moris nia Oan." <sup>17</sup>Jesus hatan ba nia: "Rahun diak ba o, Simao, Jonas nia oan, basa la'os isin ka ran mak hanorin buat ne'e ba o, maibe ha'u nia Aman ne'ebé iha lalehan. <sup>18</sup>Ha'u dehan fali ba o, 'O Pedro, no iha fatuk ne'e nia leten Ha'u sei harii Ha'u nia kreda, ne'ebé infernu nia kbiit sei la bele halo buat ida hasouru nia. <sup>19</sup>Ha'u sei fo siabe reinu lalehan nian ba o; buat hotu ne'ebé o futu iha rai, sei futu iha lalehan; no buat hotu ne'ebé o kore iha rai, sei kore mos iha lalehan.'" <sup>20</sup>Hafoin Nia husu nia eskolante sira atu bele dehan ba ema ida katak Nia mak Kristu.

### Fo sai ninia terus

<sup>21</sup>Houri loron ne'e, Jesus hahu fo sai ba nia eskolante sira katak Nia sei ba Jerusalem atu hetan terus barak husi katuas no eskriba sira, no husi am'lulik boot sira; sira sei oho Nia, hafoin, liu loron tolu, Nia sei moris fali. <sup>22</sup>Pedro lori Nia ketak hodi hahu haksi'ak Nia, dehan: "Aat ne'e la bele kona Ita, Na'it!" <sup>23</sup>Maibe, fila tiha ba Pedro, Jesus dehan: "Ba dook tiha, Satanas, o teri netik ha'u dalan; basa o la hanoin tuir Maromak nia hanoin, maibe tuir ema nian."

### Sei halo sa ida atu tuir Jesus

<sup>24</sup>Tuir mai Jesus dehan ba nia eskolante sira: "Ema ruma hakarak tuir Ha'u karik, nia sei hewai nia an rasik, sei lori nia krus hodi tuir Ha'u." <sup>25</sup>Tan ema ne'ebé hakarak soi nia moris, sei lakon moris ne'e; maibe ema ne'ebé lakon nia moris tamba Ha'u, sei hetan fali nia. <sup>26</sup>Ema ida manan los sa wainhira nia manan mundu tomak, maibe ikus mai lakon nia kllamar? Ka, ema bele fo los sa ida atu troka ho nia kllamar? <sup>27</sup>Basa Oan Mane sei mai iha nia Aman nia gloria, ho nia anju sira hodi selu ema hotu nia kolen, tuir ida-ida nia hahalok. <sup>28</sup>Ha'u dehan lialos ba imi, ema balun iha ne'e sei la mate molok sira hare Oan Mane to'o mai ho nia reinu."

### Jesús nakfíla An

<sup>1</sup>Liu tiha loron neen, Jesús bolu ketak Pedro, Tiago ho nia alin Joao hodi lori sira mesak ba foho aas ida. <sup>2</sup>Iha ne'ebá Nia nakfíla An iha sira nia oin. Nia oin nabilan hanesan loron, nia unuk sai mutin hanesan roman. <sup>3</sup>Iha oras ne'ebá Moises ho Elias mosu hodi koalía ho Nia. <sup>4</sup>Pedro hasa'e lia, dehan ba Jesús: "Na'i, diak liu Ita hela ona iha ne'e! Ita Boot hakarak karik, ami sei halo takabaluk tolu: ida ba Ita Boot, ida ba Moises, ida seluk ba Elias!" <sup>5</sup>Nia sei koalía hela, kalohan nabilan ida hamahan sira. Hafoin husi kalohan ne'e lia ida dehan: "Ida ne'e mak Ha'u nia Oan doben, ne'ebé fo ksolok mai ha'u. Imi rona Nia ba!" <sup>6</sup>Rona tiha ne'e, eskolante sira monu ba rai hodi tauk teb-tebes. <sup>7</sup>Jesús hakbesik hodi kona sira, dehan: "Imi hamriik ba, keta tauk!" <sup>8</sup>Foti tiha sira matan, sira hare deit Jesús; la iha tan ema ida.

<sup>9</sup>Wainhira sira tun dau-daun husi foho, Jesús dehan ba sira: "Imi keta haktuir ba ema ida buat ne'ebé imi foin hare to'o Oan Mane moris hi'as fali husi mate." <sup>10</sup>Eskolante sira husu ba Nia: "Tansa mak eskriba sira dehan katak Elias sei mai uluk?" <sup>11</sup>Nia hatan: "Los duni, Elias sei mai hodi halos buat hotu. <sup>12</sup>Maibe Ha'u dehan ba imi katak Elias mai tiha ona, maibe sira la hatene nia hodi halo ba nia tuir sira nia hakarak. Nune'e mos sira sei fo terus ba Oan Mane." <sup>13</sup>Ho lia hirak ne'e, sira hatene ona katak Nia koalía ba sira kona ba Joao Baptista.

### Labarik ho diabu iha laran

<sup>14</sup>Wainhira Jesús mai hasouru ema lubun boot, mane ida hakbesik ba Nia, monu ba nia ain hodi dehan: <sup>15</sup>"Na'i, sadia netik ha'u nia oan mane, basa moras bibimate nian halo nia terus teb-tebes. Nia monu fila fali ba ahi no mos ba be. <sup>16</sup>Ha'u lori ona nia ba ita nia eskolante sira, maibe sira la bele halo nia sai diak." <sup>17</sup>Jesús hatan dehan: "Imi ema fiar laek, ema aat! Ha'u sei hamutuk ho imi to'o wainhira los? Lori nia mai!" <sup>18</sup>Jesús koalía ho si'ak, no diabu sai tiha husi labarik. Houri oras ne'e nia sai diak kedas.

<sup>19</sup>Tuir mai eskolante sira hakbesik ba Jesús mesa-mesak hodi husu ba Nia: "Tansa mak ami la bele duni sai diabu ne'e?" <sup>20</sup>Nia hatan: "Tamba imi nia fiar namlele. Ha'u dehan los ba imi katak, imi nia fiar hanesan mustarda musan ida karik, imi sei dehan ba foho ne'e, 'Book o an husi ne'ebá, no nia sei book an duni; buat ida sei la susar ba imi. <sup>21</sup>Diabu sira hanesan ne'e ema bele duni sai ho deit orasaun no hadera an.

### Ba dala rua Jesús fo sai nia terus

<sup>22</sup>Wainhira sira halibur hamutuk iha Galileia, Jesús dehan ba sira: "Sira sei saran Oan Mane ba ema sira nia liman. <sup>23</sup>Sira sei oho Nia; maibe, liu tiha loron tolu, Nia sei moris hi'as." Tan ne'e, sira laran susar teb-tebes.

### Impostu Templu nian

<sup>24</sup>To'o tiha Kafarnaum, kobrador impostu sira Templu nian hakbesik ba Pedro hodi dehan ba nia: "Imi nia mestre la selu impostu?" <sup>25</sup>Nia hatan: "Selu." To'o tiha uma, Jesús hahu koalía, dehan: "Simao, o hanoin oin sa? Liurai sira simu impostu rai nian husi se: husi oan sira, ka husi ema seluk?" <sup>26</sup>Nia hatan: "Husi ema seluk." Jesús dehan ba nia: "Ne'e duni, oan sira la selu. <sup>27</sup>Maibe, atu ema keta hanoin sala, o ba tasi, soe kail hodi kaer ikan ida ne'ebé sai uluk. Loke tiha nia ibun, o sei hetan osan ida. Lori osan ne'e ba selu impostu, ha'u nian no mos o nian."

### Se mak boot liu

<sup>1</sup>Iha oras ne'ebá, eskolante sira hakbesik ba Jesús hodi husu ba Nia: "Se mak boot liu iha reinu lalehan?" <sup>2</sup>Nia bolu labarik oan ida, tau nia iha sira klaran <sup>3</sup>hodi dehan ba sira: "Ha'u dehan lialos ba imi: imi la sai karik hanesan labarik oan sira, imi sei la tama iha reinu lalehan. <sup>4</sup>Ne'e duni, ema ne'ebé haraik An hodi halo An hanesan kiik oan ne'e, nia mak boot liu iha reinu lalehan. <sup>5</sup>Ema ne'ebé simu kiik oan ida hanesan ne'e tan ha'u nia naran, nia simu ha'u. <sup>6</sup>Maibe ema ne'ebé dada ba aat kiik oan sira ne'e ida ne'ebé fiar ha'u, diak liu tara fatuk dulas batar nian iha nia kakorok hodi soe nia ba tasi laran. <sup>7</sup>Susar boot ba mundu tamba aat sira! Hanorin aat sira ne'e sei iha duni, maibe susar boot tebes ba ema ne'ebé hanorin aat!"

<sup>8</sup>O nia liman ka ain dada karik o ba sala, tesi nia hodi soe tiha! O tama iha moris kudeik diak liu fali o monu ho liman rua ka ain rua ba ahi ne'ebé la mohu. <sup>9</sup>O nia matan dada karik o ba sala, fokit nia hodi soe tiha! O tama ba moris ho matan ida deit, diak liu fali o monu ba infernu ho matan rua."

<sup>10</sup>Imi keta hewai kiik oan sira ne'e ida, basa Ha'u dehan ba imi katak sira nia Anju sira fihir nafatin ha'u Aman lalehan nia futar oin. <sup>11</sup>Basa Oan Mane mai atu soi buat ne'ebé lakon."

### Bibi ne'ebé lakon

<sup>12</sup>"Imi hanoin oin sa? Ema ida iha karik bibi atus ida, sira ne'e ida lakon tiha, nia sei la husik sira na'in sanulu resin sia iha foho hodi buka ida ne'ebé lakon? <sup>13</sup>Ha'u dehan lialos ba imi katak hetan tiha bibi ne'e, nia sei haksolok ho ida ne'e liu fali ho sira na'in sanulu resin sia ne'ebé la lakon. <sup>14</sup>Nune'e imi nia Aman iha lalehan lakohi atu kiik oan sira ne'e ida lakon."

### Hanorin malu

<sup>15</sup>O nia maun alin sala karik hasouru o, ba koalía ho nia mesa-mesak hodi hatudu nia sala. Nia rona o karik, o manan ona o nia maun alin ne'e. <sup>16</sup>Nia la rona o karik, ba lori tan ema ida ka rua atu lia hotu sai los hodi sasin rua ka tolu nia liafuan. <sup>17</sup>Nia lakohi rona karik ema sira ne'e, ba fo hatene ba Kreda. Maibe nia lakohi rona Kreda rasik, hare nia nudar ema gentiu no ema publikanu ida. <sup>18</sup>Ha'u dehan lialos ba imi: Buat hotu ne'ebé imi futu iha rai sei futu metin iha lalehan; buat hotu ne'ebé imi kore iha rai sei kore mos iha lalehan."

### Harohan hamutuk

<sup>19</sup>Ha'u dehan tan ba imi: "Imi na'in rua lia tuir malu karik iha rai atu husu naran buat ida, Ha'u Aman ne'ebé iha lalehan sei fo duni ba imi. <sup>20</sup>Basa iha fatin ne'ebé ema na'in rua ka tolu halibur hamutuk hodi Ha'u nia naran, Ha'u mos iha sira nia leet."

### Perdua dala hira

<sup>21</sup>Tuir mai, Pedro hakbesik ba Nia hodi dehan: "Na'i, ha'u nia maun alin sira sala karik hasouru ha'u, ha'u sei perdua nia dala hira? To'o dala hitu?" <sup>22</sup>Jesús hatan: "Ha'u dehan ba o la'os dala hitu, maibe hitu nulu dala hitu."

<sup>23</sup>Tan ne'e, reinu lalehan nian hanesan liurai ida ne'ebé hakarak sisi tusan ba nia atan sira. <sup>24</sup>Wainhira nia hahu sisi, sira lori mai ema ida ne'ebé iha tusan osan rihun sanulu. <sup>25</sup>Tan nia la iha buat ida hodi selu, liurai haruka fa'an tiha nia ho nia feen, nia oan sira ho nia rikuso iha sira hotu atu selu nia tusan. <sup>26</sup>Atan ne'e monu ain ba nia hodi dehan: 'Haraik loron ruma mai ha'u, ha'u sei selu hotu.' <sup>27</sup>Tan hanoin nia, atan ne'e nia Na'i husik nia ba hodi kasu nia tusan. <sup>28</sup>Wainhira atan ne'e sai husi ne'ebá, nia hetan nia maluk ida ne'ebé debe nia osan atus ida. Kaer tiha maluk ne'e, nia buti metin nia kakorok, dehan: 'Selu o nia tusan ba!' <sup>29</sup>Nia maluk monu ain ba nia hodi harohan: 'Haraik loron ruma mai ha'u, ha'u sei selu o!' <sup>30</sup>Maibe nia lakohi hodi haruka maluk ne'e ba dadur laran to'o nia selu nia tusan hotu. <sup>31</sup>Hare tiha buat ne'e, nia maluk sira ho neon susar ba haktuir ba Na'i. <sup>32</sup>Tuir mai, Na'i haruka bolu nia hodi dehan ba nia: 'Atan aat, ha'u perdua o nia tusan tomak tan o harohan mai ha'u; <sup>33</sup>Nusa mak o la hanoin o nia maluk hanesan ha'u hanoin o?' <sup>34</sup>Hafoin, ho hirus, Na'i fo nia ba dadur na'in sira to'o selu nia tusan hotu. <sup>35</sup>Imi ida-ida la perdua ho laran imi nia maun alin karik, Ha'u Aman iha lalehan sei halo mos nune'e ba imi."

## Lia kona ba divorsiu

<sup>1</sup>Koalia hotu tiha, Jesus husik Galileia hodi ba iha rai Judeia, iha Jordaun nia sorin balun ba. <sup>2</sup>Ema lubun boot la'o tuir Nia. Iha fatin ne'ebá Nia fo isin diak ba sira. <sup>3</sup>Fariseu balun hakbesik atu koko Nia hodi dehan: "Tan naran lia ruma mak mane ida bele soe nia feen, ka lae?" <sup>4</sup>Nia hatan: "Imi la lee katak houri uluk kedas Maromak halo mane ho feto hodi dehan; <sup>5</sup>Tan ne'e mak mane sei husik nia aman ho nia inan hodi moris hamutuk ho nia feen; sira na'in rua sei sai isin ida deit?" <sup>6</sup>Sira la'os na'in rua ona, maibe isin ida deit. Ne'e duni buat ne'ebé Maromak tau hamutuk, ema la bele haketak."

<sup>7</sup>Sira husu ba Nia: "Tansa Moises haruka fo surat soe malu nian ba mane ne'ebé hakarak soe nia feen?" <sup>8</sup>Nia hatan ba sira: "Tan imi nia laran tos mak Moises husik imi soe imi nia feen; maibe uluk la'os hanesan ne'e. <sup>9</sup>Ha'u dehan ba imi katak ema ruma soe karik nia feen wainhira feto ne'e la sala foer hodi hola fali feto seluk, ema ne'e halo sala adulteriu."

<sup>10</sup>Eskolante sira dehan ba Nia: "Mane ho feto hola malu hanesan ne'e karik, diak liu lalika kaben." <sup>11</sup>Maibe Nia hatan: "La'os ema hotu bele simu liafuan ida ne'e, maibe sira deit ne'ebé simu tiha grasa ne'e. <sup>12</sup>Ema balun la kaben tamba moris mai nune'e kedas ona; balun fali la kaben tamba ema halo sira hanesan ne'e, no balun la kaben tamba sira rasik halo An nune'e tan reinu lalehan. Ema ne'ebé bele simu ne'e, simu ba."

## Jesus ho labarik sira

<sup>13</sup>Ema lori labarik sira atu Jesus tau liman hodi harohan ba sira. Eskolante sira haksí'ak sira. <sup>14</sup>Maibe Jesus dehan: "Husik labarik oan sira hakbesik Ha'u, keta bandu sira, basa reinu lalehan nian sei fo ba ema hotu ne'ebé hanesan sira." <sup>15</sup>Hafoin, tau liman ba sira, Nia la'o tuir nia dalan.

## Mane klosan riku

<sup>16</sup>La kleur mane klosan ida hakbesik ba Nia dehan: "Mestre, ha'u sei halo buat diak sa atu hetan moris rohan laek?" <sup>17</sup>Jesus husu ba nia: "Tansa o husu Ha'u kona ba buat ne'ebé diak? Ida deit mak diak. Maibe, o hakarak tama ba moris karik, halo tuir ukunfuan sira ba." <sup>18</sup>Nia husu fali: "Ukunfuan ne'ebé?" Jesus hatan: "Keta oho, keta sala ho ema nia kaben, keta na'ok, keta foti lia falsu; <sup>19</sup>hamtauk o nia aman ho inan, hadomi o nia maluk hanesan o an rasik." <sup>20</sup>Klosan ne'e dehan ba Nia: "Ha'u halo tuir ona buat ne'e hotu: ha'u sei halo tan sa ida?" <sup>21</sup>Jesus dehan ba nia: "O hakarak sai ema santu karik, ba fa'an tiha buat hotu ne'ebé o iha hodi fo osan tomak ba ema kiak sira, nune'e o sei hetan murak ida iha lalehan; hafoin mai tuir Ha'u."

<sup>22</sup>Rona tiha lia hirak ne'e, mane klosan fila ho neon nakraik, basa nia iha rikusoí barak. <sup>23</sup>Tan ne'e Jesus dehan ba nia eskolante sira: "Tebes Ha'u dehan ba imi katak susar ba ema riku ida atu tama iha reinu lalehan. <sup>24</sup>Tebes, Ha'u dehan ba imi katak lalais liu ba kuda kamelu ida tama iha daum nia kuak liu fali ema riku ida tama iha reinu lalehan." <sup>25</sup>Wainhira eskolante sira rona lia ne'e, sira hakfodak hodi dehan: "Nune'e se los mak bele soi an?" <sup>26</sup>Jesus fihir sira hodi dehan: "Ba ema sira, ne'e la bele; maibe ba Maromak buat hotu bele deit."

<sup>27</sup>Tuir mai Pedro hasa'e lia dehan: "Be ami ne'ebé husik tiha buat hotu hodi tuir Ita Boot: ami sei hetan kolen sa ida?" <sup>28</sup>Jesus dehan ba sira: "Ha'u dehan lialos ba imi katak iha mundu foun, wainhira Oan Mane tur iha nia kadunan gloria nian, imi ne'ebé tuir Ha'u sei tur mos iha kadunan sanulu resin rua atu tesi lia ba suku sanulu resin rua Israel nian. <sup>29</sup>Ema hotu ne'ebé husik uma, maun alin, feton, aman, inan, oan sira ka rai, tan ha'u nia naran, sei simu dala atus ida liu tan hodi hetan mos moris rohan laek nudar liman rohan. <sup>30</sup>Sira ne'ebé ohin ne'e uluk, barak sei ikus fali; no sira ne'ebé ohin ne'e ikus, barak sei uluk fali."

20

## Aiknanoik serbisu na'in sira nian

<sup>14</sup>Reinu lalehan nian hanesan to'os na'in ida ne'ebé sai iha dader atu halo kontratu ho ema serbisu na'in sira ba nia to'os. <sup>2</sup>Nia halo kontratu ho sira loron ida denariu ida hodi haruka sira ba nia to'os. <sup>3</sup>Tuku sia, nia sai fali hodi hare ema sira seluk iha luron la halo buat ida. <sup>4</sup>Nia dehan ba sira: "Imi mos ba ha'u nia to'os, ha'u sei selu imi nia kolen." <sup>5</sup>Sira ba. Nia sai fali iha loron fahe rua, no mos tuku tolu loraik hodi halo nune'e nafatin. <sup>6</sup>Tuku lima loraik, nia hetan tan ema seluk iha ne'ebá. <sup>7</sup>Nia husu ba sira: "Tan sa imi hamriik loron tomak iha ne'e la halo serbisu ruma?" Sira hatan, "Ema la bolu ami." Nia dehan ba sira: "Imi mos ba ha'u nia to'os." <sup>8</sup>Iha loraik, to'os na'in dehan ba mandor: "Bolu serbisu na'in sira hodi selu sira nia kolen, hahu husi sira ikus to'o sira uluk." <sup>9</sup>Sira ne'ebé mai tuku lima loraik hakbesik hodi simu ida-ida denariu ida. <sup>10</sup>Wainhira sira ne'ebé uluk mai, sira hanoin atu simu liu maibe sira mos simu ida-ida denariu ida. <sup>11</sup>Simu tiha osan, sira hamuun hasouru to'os na'in hodi dehan: <sup>12</sup>"Sira ne'ebé ikus ne'e serbisu oras ida deit, o selu sira hanesan ami, ne'ebé terus kole ho manas loron tomak." <sup>13</sup>Nia hatan ba sira: "Ha'u belun, ha'u la hasouru ha'u lia ba o: ita la halo kontratu denariu ida ba loron ida?" <sup>14</sup>Ne'e duni, simu buat ne'ebé o nian hodi ba ona. Ha'u hakarak fo ida ikus ne'e hanesan ha'u fo ba o. <sup>15</sup>Ha'u la bele halo ho ha'u nia rikusoí nudar ha'u hakarak? Ka o laran moras tamba ha'u laran diak?"

<sup>16</sup>Nune'e sira ne'ebé ikus sei sai uluk, sira ne'ebé uluk sei sai ikus.

## Ba dala tolu Jesus fo sai kona ba nia terus

<sup>17</sup>Sa'e dau-daun ba Jerusalem, Jesus bolu ketak sira na'in sanulu resin rua hodi dehan ba sira: <sup>18</sup>"Ita sa'e ba Jerusalem. Ema sei saran Oan Mane ba am'lulik boot no eskriba sira, ne'ebé sei tesi lia atu Nia mate. <sup>19</sup>Hafoin sira sei saran Nia ba gentiu sira atu hamoe Nia, baku Nia hodi hedi Nia ba krus. Liu loron tolu, Nia sei moris hi'as."

## Zebedeu nia oan sira

<sup>20</sup>Tuir mai Zebedeu oan sira nia inan hakbesik Jesus hamutuk ho nia oan sira, monu iha nia ain hodi husu buat ida. <sup>21</sup>Jesus husu ba nia: "Ita hakarak sa ida?" Nia hatan: "Ita boot haruka atu atan nia oan mane rua ne'e ida tur iha ita sorin kuana, ida iha ita sorin karuk iha ita boot nia reinu." <sup>22</sup>Jesus dehan: "Imi la hatene buat ne'ebé imi husu ne'e. Imi bele hemu husi kalis ne'ebé Ha'u atu hemu?" Sira hatan: "Ami bele." <sup>23</sup>Nia dehan fali ba sira: "Tebes duni, imi sei hemu husi ha'u nia kalis; maibe tur iha ha'u nia sorin kuana eh karuk, ne'e la'os Ha'u mak fo; ne'e ba sira ne'ebé ha'u Aman hadia hela."

<sup>24</sup>Rona tiha ne'e, sira na'in sanulu hirus maun alin rua ne'e. <sup>25</sup>Jesus bolu sira hodi dehan ba sira: "Imi hatene katak na'i ulun gentiu sira nian ukun povu hodi kroat. <sup>26</sup>Imi sei la halo hanesan ne'e; maibe iha imi leet se mak hakarak sai boot, nia sei sai imi nia atan; <sup>27</sup>no ida ne'ebé hakarak sai uluk, nia sei serbi sira seluk; <sup>28</sup>Hanesan Oan Mane mai la'os atu ema serbi Nia, maibe atu serbi hodi saran nia moris atu soi ema barak."

## Ema Matan delek hare fali

<sup>29</sup>Wainhira Jesus sai husi Jeriko, ema lubun boot la'o tuir Nia. <sup>30</sup>Iha oras ne'ebá ema matan delek rua tur hela iha dalan ninin. Rona tiha katak Jesus liu dau-daun, sira hakilar. "Na'i, David nia Oan, hanoin ami!" <sup>31</sup>Ema lubun boot si'ak sira hodi haruka sira nonok, maibe sira hakilar liu tan: "Na'i, David nia Oan, hanoin ami!" <sup>32</sup>Jesus hamriik, bolu sira hodi husu ba sira: "Imi hakarak Ha'u halo sa ida ba imi?" <sup>33</sup>Sira dehan ba Nia: "Na'i, ami hakarak hare." <sup>34</sup>Jesus hanoin tebes sira hodi kona sira nia matan. Sira matan diak kedas no ema sira ne'e tuir Nia.

21

## Jesus tama nudar liurai iha Jerusalem

<sup>1</sup>Wainhira sira to'o iha Betfage, iha foho oliveira, besik ona Jerusalem, Jesus haruka eskolante na'in rua, <sup>2</sup>hodi dehan ba sira: "Imi ba knua ne'ebé iha imi nia oin: imi sei hetan kuda burru inan ida kesi hela hamutuk ho kuda oan ida. Imi kore sira, lori mai Ha'u. <sup>3</sup>Ema ruma husu karik, imi sei hatan: 'Na'i presisa sira, maibe sei fo fali kedas.'"

<sup>4</sup>Buat ne'e mosu atu halo tuir lia ne'ebé profeta uluk fo sai: <sup>54</sup>"Imi dehan ba Siao nia oan feto: O nia liurai sei mai hasouru o ho laran kmaus, sa'e kuda burru inan ho nia oan."

<sup>6</sup>Eskolante sira ba hodi halo nudar Jesus haruka ba sira: <sup>7</sup>Sira lori kuda inan ho oan mai, tau sira nia unuk iha kuda nia leten, hafoin Jesus tur iha leten. <sup>8</sup>Ema lubun boot nahe sira nia tais iha dalan; sira seluk tesi ai-sanak sira hodi halekar iha dalan. <sup>9</sup>Sira ne'ebé la'o iha Jesus nia oin no sira ne'ebé tuir Nia hakilar maka'as: "Osana ba David nia Oan! Rahun diak ba Ida ne'ebé mai hodi Na'i nia naran! Osana leten aas ba!"

<sup>10</sup>Wainhira Jesus tama iha Jerusalem, ema hotu ne'ebé iha sidade dehan: “Se mak ne'e?” No ema lubun boot hatan: “Ne'e mak profeta Jesus husi Nazare Galileia nian.”

### Duni sai kontratu na'in sira husi templu

<sup>12</sup>Jesus tama iha templu hodi duni sai ema sira hotu ne'ebé fila liman iha ne'ebá; Nia taka fila ema troka osan sira nia mesa, no mos sira ne'ebé fa'an falur nia banku sira hodi dehan ba sira: <sup>13</sup>“Hakerek tiha ona: ‘Ema sei hanaran Ha'u nia uma orasaun nian’, maibe imi halo nia sai na'okten sira nia knuuk!”

<sup>14</sup>Iha mos ema matan delek no ain kudeik sira ne'ebé hakbesik ba Nia iha templu laran. Nia fo isin diak ba sira hotu. <sup>15</sup>Maibe wainhira am'lulik boot sira ho eskriba sira hare buat foun hirak ne'ebé Nia halo, ho tan labarik sira ne'ebé hakilar iha Templu “Osana ba David nia Oan!” sira laran nakali, <sup>16</sup>hodi dehan ba Nia: “O rona buat ne'ebé sira dehan?” Jesus hatan: “Ha'u rona duni. Imi seidaok lee: ‘Husi labarik no kiik oan sira ne'ebé inan ko'us mak o hetan hahi?’” <sup>17</sup>Tuir mai, husik tiha sira hodi sai tiha husi sidade, Nia horik iha Betania.

### Malisan ba ai figueira

<sup>18</sup>Dadersan nakukun, sira fila ba sidade. Tuir dalan, Nia hamlaha. <sup>19</sup>Hare tiha ai figueira hun ida iha dalan ninin, Nia hakbesik hodi hetan deit mak ai tahan. Nia dehan: “O sei la fuan tan!” Iha duni oras ne'e, ai figueira namlaek kedas. <sup>20</sup>Hare ida ne'e, eskolante sira hakfodak, dehan: “Oin sa mak ai figueira ne'e namlaek kedas deit?” <sup>21</sup>Jesus dehan ba sira: “Ha'u dehan lialos ba imi: ‘Imi fiar karik, imi nia laran la namlele karik, imi sei la halo deit buat ne'ebé Ha'u halo ba ai figueira ne'e; maibe imi dehan karik ba foho ida ne'e: ‘Sai tiha husi ne'e, soe o an ba tasi’, sei sai duni nune'e.” <sup>22</sup>Imi fiar karik, buat hotu ne'ebé imi husu iha orasaun, imi sei simu.”

### Jesus nia kbiit

<sup>23</sup>Tuir mai Nia tama iha Templu. Nia hanorin dau-daun, am'lulik boot sira no katuas sira povu nian hakbesik Nia hodi dehan, “Ho kbiit ne'ebé mak o halo buat ne'e? Se mak fo ba o kbiit ida ne'e?” <sup>24</sup>Jesus hatan ba sira: “Ha'u mos sei husu buat ida ba imi: imi hatan karik, Ha'u sei dehan ba imi ho kbiit ne'ebé mak Ha'u halo buat ne'e.” <sup>25</sup>Joao nia baptisnu mai husi ne'ebé: husi lalehan, ka husi ema sira?” Maibe sira hahu hanoin iha sira laran: “Ita hatan karik ‘Mai husi lalehan,’ Nia sei dehan mai ita: ‘Tansa imi la fiar nia?’” <sup>26</sup>Ita hatan karik ‘Mai husi ema sira, ita tauk ema lubun, basa hot-hotu fiar katak Joao profeta ida.” <sup>27</sup>Ne'e duni, sira hatan ba Jesus: “Ami la hatene.” Nia dehan fali ba sira: “Ha'u mos sei la dehan ba imi ho kbiit ne'ebé mak Ha'u halo ne'e.”

### Aiknanoik maun alin na'in rua nian

<sup>28</sup>“Imi hanoin oin sa? Ema ida iha oan mane na'in rua. Nia ba ida uluk hodi dehan: ‘Oan, ohin o ba serbisu iha to'os,’” <sup>29</sup>Oan ne'e hatan: ‘Ha'u lakohi.’ Maibe, la kleur, nia hakribi hodi ba. <sup>30</sup>Nia ba fali ida seluk hodi dehan ba nia hanesan nia dehan ba ida uluk Ida ne'e hatan; ‘Ha'u ba, Na'i.’ Maibe nia la ba. <sup>31</sup>Sira na'in rua ne'e, ida ne'ebé mak halo tuir nia aman nia hakarak?” Sira hatan: “Ida uluk.” Jesus dehan ba sira: “Ha'u dehan lialos ba imi: ema publikanu no fetu moris aat sira sei la'o uluk imi ba Maromak nia reinu. <sup>32</sup>Joao mosu ba imi hodi hatudu dalan moris diak nian, imi la fiar, maibe ema publikanu no fetu moris aat sira fiar nia. Maski imi hare ona ida ne'e, imi lakohi hakribi sala hodi fiar iha nia.”

### To'os atan aat

<sup>33</sup>“Rona aiknanoik ida ne'e tan. Ema ida kuda uvas iha to'os ida. Hale'u tiha ho lutu, nia ke'e fatin sama uvas ida iha to'os laran hodi harii uma aas ida; nia aluga ba ema sira, hafoin nia ba rai dook ida. <sup>34</sup>To'o tempu atu ku'u uvas nian, nia haruka nia atan atu ba husu buat ne'ebé monu ba nia. <sup>35</sup>Maibe ema sira ne'e kaer atan sira, baku ida, oho ida seluk, tuda tan sira seluk. <sup>36</sup>Tuir mai nia haruka tan atan sira seluk, barak liu fali sira uluk, maibe ema sira halo mos nune'e ba sira. <sup>37</sup>Ikus mai nia haruka nia oan rasik hodi dehan: ‘Sira sei hamtauk ha'u nia oan.’” <sup>38</sup>Maibe hare tiha nia oan, ema sira dehan ba malu: ‘Ida ne'e mak liman rohan na'in.’” <sup>39</sup>Ne'e duni, sira kaer nia, soe ba to'os liur hodi oho nia. <sup>40</sup>Wainhira to'os na'in mai, nia sei halo sa los ba ema sira ne'e?” <sup>41</sup>Sira hatan: “Nia sei haruka oho ema aat sira ne'e hodi saran to'os ba ema sira seluk ne'ebé, to'o los tempu, sei hatama ai-fuan ba nia.” <sup>42</sup>Jesus dehan ba sira: “Imi seidaok lee Eskritura sira, ‘Fatuk ne'ebé badaun sira hewai nakfila an ba fatuk inan? Ne'e, buat ne'ebé Na'i halo, kmanek tebes duni ba ita matan.’”

<sup>43</sup>“Tan ne'e Ha'u dehan ba imi: ‘Maromak nia reinu sei hasai tiha husi imi hodi fo fali ba povu ida ne'ebé sei fo fuan.’” <sup>44</sup>(Ema ne'ebé monu ba fatuk ne'e sei rahun hotu; fatuk ne'e monu ba ema ruma karik, nia sei rahun hotu.) <sup>45</sup>Rona tiha aiknanoik hirak ne'e, am'lulik boot sira no eskriba sira hatene lo-los katak nia koalia kona ba sira. <sup>46</sup>Sira hakarak kaer Nia, maibe sira tauk povu ne'ebé hare Nia nudar profeta.

### Aiknanoik festa kaben nian

<sup>1</sup>Jesus koalia fali ho aiknanoik hodi dehan ba sira: <sup>2</sup>“Ita bele tanesan reinu lalehan nian ba liurai ida ne'ebé halo festa kaben ba nia oan mane. <sup>3</sup>Nia haruka atan sira atu ba bolu konvidadu sira ba festa, maibe sira lakohi mai. ‘Nia haruka tan atan sira seluk, dehan: ‘Imi dehan ba konvidadu sira: Aihan pruntu tiha ona, ha'u nia karau ho balada sira oho tiha ona, buat hotu nahe tiha ona, imi mai kaben.’” <sup>5</sup>Maibe, hanesan lia la kona sira, ida ba tiha nia to'os, ida ba nia kontratu, <sup>6</sup>sira seluk kaer tiha atan sira, baku sira, oho tan sira. ‘Liurai laran nakali teb-tebes, haruka nia soldadu sira atu oho ema aat sira ne'e hodi sunu sira nia sidade. <sup>8</sup>Hafoin nia dehan ba atan sira: ‘Festa kaben pruntu ona, maibe konvidadu sira la soi. <sup>9</sup>Ne'e duni, imi ba luron sira hodi konvida ba festa ema hotu ne'ebé imi hetan.’” <sup>10</sup>Atan sira sai duni ba luron sira no halibur hamutuk ema hotu ne'ebé sira hetan, diak no aat hodi halo festa fatin nakonu. <sup>11</sup>Wainhira liurai tama atu hare konvidadu sira, nia hare ema ida ne'ebé la hatais unik festa nian, <sup>12</sup>nia dehan ba ema ne'e: ‘Belun, tansa o tama iha ne'e la hatais festa nian?’ Ema ne'e nonok hela. <sup>13</sup>Tan ne'e, liurai dehan ba atan sira: ‘Imi kesi metin nia liman ho ain, soe nia ba nakukun iha liur, iha ne'ebá sei iha tanis no ruun nehan’” <sup>14</sup>Basa Na'i bolu barak, maibe hili uituan deit.”

### Kona ba impostu ba Cesar

<sup>15</sup>Tuir mai, fariseu sira halibur an hamutuk hodi futu lia oin sa sira bele kaer Nia iha liafuan ruma. <sup>16</sup>Sira haruka sira nia eskolante sira hamutuk ho herodianu sira atu dehan ba Nia: “Mestre, ami hatene katak Ita koalia lialos, Ita hanorin Maromak nia dalan tuir lialos, la tauk ema ida, basa Ita la fihir ema. <sup>17</sup>Ne'e duni, dehan mai ami Ita hanoin oin sa: bele selu impostu ba Cesar ka lae?”” <sup>18</sup>Tan hatene sira nia laran aat, Jesus hatan: “Laran makerek sira, tansa imi babeur Ha'u?” <sup>19</sup>Imi hatudu osan impostu nian mai” Sira hatudu denariu ida ba Nia. Nia husu: <sup>20</sup>“Se nia ilas mak ne'e, ho buat hakerek ne'e?”” <sup>21</sup>Sira hatan: “Cesar nian” Ho ne'e, Jesus dehan ba sira: “Ne'e duni, imi fo ba Cesar buat ne'ebé Cesar nian, no ba Maromak buat ne'ebé Maromak nian.”

<sup>22</sup>Rona tiha ne'e, sira hakfodak; hafoin sira la'o tiha hodi husik Nia mesak.

### Kona ba moris hi'as

<sup>23</sup>Iha loron ne'e mos, saduseu sira ne'ebé la fiar moris hi'as, ba buka Nia hodi husu ba Nia: <sup>24</sup>“Mestre, Moises hanorin katak: ‘Mane ruma mate karik oan la iha, nia alin sei kaben ho fetu faluk ida ne'e atu fo oan ba nia maun.’” <sup>25</sup>Iha ami leet iha maun alin na'in hitu. Ida uluk kaben tiha, mate la husik oan hodi husik deit fetu ba nia alin. <sup>26</sup>Ida tuir mai mos hanesan; ida seluk mos hanesan, nune'e hotu to'o ida hitu. <sup>27</sup>Ikus liu hotu, fetu ne'e mos mate. <sup>28</sup>Iha loron moris hi'as nian, sira na'in hitu ne'e ida ne'ebé los mak fetu nia laen, basa sira hotu hola nia?”” <sup>29</sup>Jesus hatan ba sira: “Imi hanoin sala, basa imi la hatene Eskritura no Maromak nia kbiit. <sup>30</sup>Basa iha loron moris hi'as nian mane no fetu sira sei la hola malu tan, maibe sira sei sai hanesan anju sira iha lalehan. <sup>31</sup>Kona ba moris hi'as husi mate, imi la lee buat ne'ebé Maromak dehan ba imi: <sup>32</sup>‘Ha'u mak Abraao nia Maromak, Isaac nia Maromak, no Jacob nia Maromak.’” Nia la'os ema mate sira nia Maromak, maibe ema moris sira nia Maromak!

<sup>33</sup>*Rona tiha Nia, ema lubun boot hakfodak ho nia doutrina.*

## Ukunfuan ne'ebé boot liu

<sup>34</sup>Wainhira fariseu sira rona katak Jesus halo saduseu sira sai nonok, sira halibur an hamutuk. <sup>35</sup>Sira ida, doutor ukunfuan nian, husu hodi koko Nia: <sup>36</sup>“Mestre, ukunfuan ida ne'ebé mak boot liu?” <sup>37</sup>Jesus hatan ba nia: “O sei hadomi Na'i, o nia Maromak ho neon ho laran, ho o nia kllamar tomak. <sup>38</sup>Ida ne'e mak ukunfuan uluk no boot liu hotu. <sup>39</sup>Ida tuir mai, atu hanesan nia mak: ‘O sei hadomi ema seluk hanesan o nia an rasik.’ <sup>40</sup>Ukunfuan rua ne'e, ukunfuan sira hotu no profeta sira nia hun.”

## Messias, David nia Oan

<sup>41</sup>Wainhira fariseu sira halibur an hamutuk, Jesus husu ba sira: <sup>42</sup>“Imi hanoin sa ida kona ba Kristu? Nia se nia Oan?” Sira hatan ba Nia: “David nia oan.” <sup>43</sup>Nia dehan ba sira: “Nune'e karik, tansa mak David, tuir Espiritu nia hanorin, hanaran Nia Na'i hodi dehan; <sup>44</sup>Na'i dehan ba ha'u nia Na'i: O tur iha ha'u nia sorin kuana to'o loron Ha'u tau o nia funu balun sira iha o nia ain okos?” <sup>45</sup>David hanaran nia karik Na'i, nusa mak nia mos nia oan?” <sup>46</sup>Ema ida la hatene atu hatan oin sa ba Nia; no hahu husi loron ne'e, ema ida la berani atu husu tan Nia.

## 23

### Hasouru eskriba no fariseu sira

<sup>1</sup>Tuir mai Jesus koalia ba ema lubun boot no ba nia eskolante sira, dehan: <sup>2</sup>“Eskriba no fariseu sira tur iha Moises nia kadeira. <sup>3</sup>Ne'e duni, imi simu hodi halo tuir buat hotu ne'ebé sira dehan ba imi; maibe keta tuir sira nia hahalok, basa sira koalia maibe la halo. <sup>4</sup>Sira futu naha todan ne'ebé susar atu foti hodi tau ba ema sira nia kabas, maibe sira rasik la book nia ho liman fuan ida. <sup>5</sup>Sira halo buat hotu atu ema hare sira. Nune'e, sira kesi fita boot ida ba sira nia rentos hodi hanaruk sira nia tais ninin; <sup>6</sup>sira kaan tur iha fatin uluk iha festa sira hodi buka tur iha oin iha sinagoga laran; <sup>7</sup>Sira hakarak ema kumprimenta sira iha prasa hodi bolu sira ‘Rabbi.’ <sup>8</sup>Imi fali, keta husik ema hanaran imi ‘Rabbi’, basa imi nia Mestre ida deit, no imi hotu mesa maun alin. <sup>9</sup>Keta bolu ema ida aman iha rai, basa imi nia Aman ida deit, ne'ebé iha lalehan. <sup>10</sup>Keta husik ema hanaran imi doutor, basa imi nia doutor ida deit: Kristu. <sup>11</sup>Imi ida ne'ebé boot liu sei sai imi nia atan. <sup>12</sup>Ida ne'ebé foti an, Na'i sei hatun nia; ida ne'ebé haraik an, Na'i sei hahi nia.”

<sup>13</sup>“Susar boot ba imi, eskriba no fariseu sira, laran makerek, basa imi taka reinu lalehan nian ba ema sira; imi la tama, mos la husik ema seluk ne'ebé hakarak tama. <sup>14</sup>Susar boot ba imi, eskriba no fariseu sira, laran makerek. Imi han mohu feto faluk sira nia uma hodi lohi sira ho imi nia orasaun nar-naruk; tan ne'e iha loron tesi lia nian, imi sei hetan kastigu boot. <sup>15</sup>Susar boot ba imi eskriba no fariseu sira, laran makerek. Imi hakur tasi la'o lemo rai hodi dada ema hotu tuir imi nia fiar no wainhira ida monu iha imi nia liman, imi halo nia infernu nia oan, aat liu imi dala rua. <sup>16</sup>Susar boot ba imi, matadalan sira ne'ebé matan delek! Imi dehan: ‘Ema jura karik ba templu, ne'e la iha buat ida; maibe ema jura karik ba osan mean templu nian, nia sei halo tuir.’ <sup>17</sup>Beikten no matan delek sira! Ida ne'ebé mak folin liu: osan mean, ka Templu ne'ebé halo santu osan mean? <sup>18</sup>Imi dehan tan: ‘Ema ruma jura karik ba altar, ne'e la iha buat ida; maibe nia jura karik ba buat karan ne'ebé iha altar leten, nia sei halo tuir.’ <sup>19</sup>Matan delek sira! Ida ne'ebé mak folin liu; buat karan, ka altar ne'ebé halo santu buat karan? <sup>20</sup>Ne'e duni, jura ba altar ne'e katak jura ba nia no mos ba buat ne'ebé iha nia leten. <sup>21</sup>Jura ba Templu, ne'e katak jura ba nia no mos ba Ida ne'ebé horik iha nia. <sup>22</sup>Jura ba lalehan, ne'e katak jura ba Maromak nia tur fatin no mos ba Ida ne'ebé tur iha nia. <sup>23</sup>Susar ba imi, eskriba no fariseu sira ne'ebé laran makerek! Imi selu du'ut morin sira nia impostu hodi tau ba sorin buat hirak ne'ebé boot liu iha ukunfuan: justisa, laran luak no laran mos. Tuir lo-los, imi sei halo tuir buat hirak ne'e hodi la hewai buat seluk. <sup>24</sup>Imi matadalan matan delek sira ba ema matan delek sira. Imi tais susuk maibe tolan kuda kamelu!.

<sup>25</sup>Susar boot ba imi, eskriba no fariseu sira, laran makerek! Imi hamos kopu no bikan sira husi liur, maibe iha laran nakonu ho na'ok no buat aat. <sup>26</sup>Fariseu matan delek sira, hamos uluk kopu no bikan laran atu bele sai mos iha liur. <sup>27</sup>Susar boot ba imi, eskriba no fariseu sira, laran makerek! Imi hanesan rate sira ne'ebé pinta mutin, furak iha liur, maibe iha laran nakonu ho mate ruin no buat foer oi-oin. <sup>28</sup>Nune'e mos imi, ema sira hare imi mos iha liur, maibe iha laran nakonu ho lia bosok no hahalok aat. <sup>29</sup>Susar boot ba imi, eskriba no fariseu sira, laran makerek, basa imi hada rate ba profeta sira hodi hafutar ema diak sira nia rate, <sup>30</sup>dehan: ‘Ita moris karik iha ita bei-ala sira nia tempu, ita liman la foer hanesan sira nian ho profeta sira nia ran.’ <sup>31</sup>Nune'e imi hatudu katak imi nia bei-ala sira mak oho profeta sira! <sup>32</sup>Ne'e duni, imi halo to'o rohan buat ne'ebé imi nia bei-ala sira hahu!”

<sup>33</sup>“Imi samea sira, samea nia oan sira! Oin sa mak imi bele halai husi kastigu infernu nian? <sup>34</sup>Tan ne'e Ha'u haruka ba imi profeta no ema matenek no eskriba sira. Sira balun, imi sei oho hodi hedi ba krus; sira seluk imi sei baku iha imi nia sinagoga sira, imi sei duni sira husi sidade ida ba sidade seluk. <sup>35</sup>Nune'e sei nakfakar ba imi leten ema sala laek nia ran ne'ebé uluk nakfakar iha rai, hahu husi Abel sala laek nia ran, to'o Zacarias, Baraquias nia oan, ne'ebé imi oho iha santuariu no altar nia kllaran. <sup>36</sup>Ha'u dehan lialos ba imi, buat ne'e hotu sei fo todan ba derasaun ne'e.”

<sup>37</sup>“Jerusalem, Jerusalem, o ne'ebé oho profeta sira, o ne'ebé toda ho fatuk ema sira ne'ebé Na'i haruka ba o! Dala hira ona mak Ha'u hakarak halibur hamutuk o nia oan sira, hanesan manu inan halibur nia oan sira iha nia liras okos, maibe o lakohi! <sup>38</sup>Tan ne'e imi nia uma sei sai mamuk. <sup>39</sup>Basa Ha'u dehan ba imi katak imi sei la hare tan Ha'u to'o loron ne'ebé imi dehan: ‘Rahun diak ba ida ne'ebé mai hodi Na'i nia naran.’”

## 24

### Templu sei naksobu rahun

<sup>1</sup>Jesus sai dau-daun husi Templu no nia eskolante sira hakbesik Nia hodi hatudu ba Nia uma kreda boot ne'e. <sup>2</sup>Nia hatan ba sira dehan: “Imi hare buat ne'e? Ha'u dehan lialos ba imi katak iha ne'e fatuk ida sei la hela iha fatuk seluk nia leten, sei naksobu hotu.”

<sup>3</sup>Hafoin, wainhira Nia tur iha foho oliveira nian, eskolante sira hakbesik Nia hodi husu mesa-mesak ba Nia; “Dehan mai ami wainhira buat ne'e hotu sei mosu, sinal ida ne'ebé mak sei hatudu ida nia hiit an mai, no mundu ne'e atu hotu.”

### Tempu susar no terus nian

<sup>4</sup>Jesus hatan ba sira: “Imi matan moris neon na'in, atu ema keta lohi imi. <sup>5</sup>Basa ema barak sei mai hodi ha'u nia naran dehan; ‘Ha'u mak Kristu.’ Ho ne'e, sira sei lohi ema barak. <sup>6</sup>Imi sei rona koalia kona ba funu, kona ba lia funu nian: keta hakfodak, basa buat ne'e sei mosu duni, maibe rohan seidaok to'o. <sup>7</sup>Povu sei hamriik hasouru povu, reinu hasouru reinu; rai sei hamlaha, sei iha moras peste, rai sei nakdoko iha fatin oi-oin. <sup>8</sup>Ne'e hotu sei hatudu katak terus foin hahu. <sup>9</sup>Iha tempu ne'e sira sei haterus imi to'o mate; povu hotu sei odi imi tan ha'u nia naran. <sup>10</sup>Ema barak sei monu ba aat; sira sei bobar lia ba malu, sei rai odi ba malu. <sup>11</sup>Profeta falsu barak sei mosu ne'ebé sei lohi ema barak. <sup>12</sup>Tamba hahalok aat sira sei sai wa'in liu tan, ema barak nia domin sei namlack. <sup>13</sup>Maibe ema ne'ebé fiar metin to'o rohan sei hetan moris rohan laek. <sup>14</sup>Lia foun reinu nian ne'e sei haklaken iha mundu tomak hodi fo sasin ba povu hotu. Iha oras ne'e sei to'o mai buat hotu nia rohan. <sup>15</sup>Ne'e duni, wainhira imi hare terus aat teb-tebes ne'ebé Profeta Daniel dehan nanis mosu iha fatin santu (ema ne'ebé lee buka hatene), <sup>16</sup>iha oras ne'e ema sira ne'ebé iha Judeia sei halai ba foho; <sup>17</sup>ema ne'ebé iha uma nia kakuluk, keta tun atu foti buat ida iha uma laran; <sup>18</sup>ida ne'ebé iha to'os keta fila atu foti nia tais. <sup>19</sup>Susar boot ba feto sira ne'ebé isin rua no sira ne'ebé fo susu ba nia oan iha loron hirak ne'e! <sup>20</sup>Imi harohan ba, atu imi lalika halai iha tempu malirin ka iha loron Sabadu. <sup>21</sup>Basa iha loron ne'e terus sei sai boot teb-tebes: houri mundu hahu to'o ohin seidaok mosu terus hanesan ne'e, aban bainrua mos sei la iha tan. <sup>22</sup>Loron ne'e la sai badak karik, ema hotu sei lakon, maibe loron ne'e sei sai badak duni tamba sira ne'ebé Na'i fihir ona. <sup>23</sup>Wainhira ema ida hateten ba imi, ‘Kristu mak ne'e’, ‘Mak ne'ebá’, imi keta fiar. <sup>24</sup>Basa Kristu falsu no profeta falsu sira sei mosu hodi hatudu sinal no milagre sira hodi lohi, bele karik, sira hotu ne'ebé Na'i fihir. <sup>25</sup>Keta haluha, Ha'u fo hatene ne'e nanis ona.”

### Oan Mane sei mai fali

<sup>26</sup>“Ne'e duni, sira dehan karik ba imi: ‘Nia iha rai fuik maran,’ imi keta ba ne'ebá. Ka: ‘Nia iha uma laran,’ imi keta fiar. <sup>27</sup>Basa Oan Mane sei mai hanesan railakan nabalan teki loromonu to'o lorosa'e. <sup>28</sup>Basa iha fatin ne'ebé isin mate hela, iha ne'ebá manu makikit sei halibur hamutuk. <sup>29</sup>Liu tiha susar boot loron hirak ne'e nian, teki-teki loron sei nakukun, fulan sei la nabalan tan, fitun sira sei monu husi lalehan, lalehan nia kbiit sei nakdoko. <sup>30</sup>Hafoin Oan Mane nia sinal sei mosu iha lalehan, povu sira iha raikllaran sei tanis, no sira sei hare Oan Mane iha kalohan leten ho kbiit no kmanek wa'in. <sup>31</sup>Nia sei haruka nia anju sira ho trombeta maka'as atu halibur sira ne'ebé Nia fihir husi anin hat, husi lalehan nia hun to'o nia rohan.”

### Aiknanoik ai figueira nian

<sup>32</sup>“Imi buka hatene aiknanoik ai figueira nian: wainhira nia sanak sira sai nurak no hatubun tahan sira, imi hatene katak bainloron besik ona. <sup>33</sup>Nune’e mos, wainhira imi hare buat ne’e hotu, imi hatene katak Nia besik to’o ona, iha duni odamatan ona. <sup>34</sup>Ha’u dehan lialos ba imi: molok derasaun ne’e liu ona, buat sira ne’e hotu sei mosu mai. <sup>35</sup>Lalehan no rai sei liu, maibe ha’u nia liafuan sei la liu.

### Hein loron ikus

<sup>36</sup>“Kona ba loron no oras ne’e, ema ida la hatene: anju sira iha lalehan mos la hatene, Oan mos lae; Aman deit mak hatene. <sup>37</sup>Hanesan uluk iha Noe nia loron, nune’e mos sei mosu, wainhira Oan Mane hiit An mai. <sup>38</sup>Iha loron hirak ne’ebé, molok udan boot tau, ema sira han, hemu, kaben no fo kaben, to’o loron ne’ebé Noe tama ba ro; <sup>39</sup>sira la hatene buat ida to’o udan boot mai hodi taka sira hotu. Sei mosu mos nune’e wainhira Oan Mane sei hiit An mai. <sup>40</sup>Iha loron ne’e mane na’in rua sei iha to’os laran: ida ema sei lori, ida seluk sei husik hela; <sup>41</sup>feto na’in rua sei fai aihan iha lesun; ida ema sei lori, ida seluk sei husik hela. <sup>42</sup>Ne’e duni, imi matan moris neon na’in ba basa imi la hatene loron wainhira imi nia Na’i sei hiit An mai. <sup>43</sup>Imi buka hatene ida ne’e: uma na’in hatene karik tuku hira ahu-na’in sei mai, nia sei matan moris neon na’in, sei la husik sobu nia uma. <sup>44</sup>Tan ne’e imi mos hein hela ba, basa Oan Mane sei mai iha oras ne’ebé imi la hanoin.”

### Aiknanoik atan badinas nian

<sup>45</sup>“Ne’e duni, se los mak ema matenek no badinas ne’ebé Na’i haruka atu tau matan ba nia atan sira hodi fo han sira iha tempu lo-los? <sup>46</sup>Rahun diak ba ema ne’ebé, wainhira Na’i fila mai, nia sei hetan nia badinas nune’e. <sup>47</sup>Ha’u dehan lialos ba imi, Na’i sei tau nia rikuso tomak iha nia liman. <sup>48</sup>Maibe, ema ne’e aat karik hodi dehan ba nia an: ‘Ha’u nia Na’i sei kleur.’ Hafoin hahu baku nia maluk sira hodi han no hemu ho lanuten sira; <sup>50</sup>atan ne’e nia Na’i sei mai iha loron ne’ebé nia la hein, iha oras ne’ebé nia la hatene. <sup>51</sup>Na’i sei fo kastigu todan ba nia hodi tau nia hamutuk ho ema laran makerek sira iha fatin ne’ebé ema sei tanis no ruun nehan.

25

### Aiknanoik fetoran sanulu nian

<sup>14</sup>“Reinu lalehan nian sei hanesan fetoran sanulu ne’ebé kaer tiha nia ahi-oan hodi ba hasouru noivu. <sup>2</sup>Sira na’in lima beik, na’in lima seluk matenek. <sup>3</sup>Sira ne’ebé beik lori sira nia ahi-oan, maibe la lori mina; <sup>4</sup>sira ne’ebé matenek lori mos mina iha botil, hamutuk ho sira nia ahi-oan. <sup>5</sup>Tan noivu, la mai lalais, sira matan dukur to’o sira toba ona. <sup>6</sup>Kalan fahe rua, ema hakilar. ‘Noivu mai ona, imi ba hasouru nia!’ <sup>7</sup>Fetoran sira hotu hader hodi hadia sira nia ahi-oan. <sup>8</sup>Fetoran beik sira dehan ba matenek sira; ‘Fo imi nia mina uitoan mai ami, basa ami nia ahi-oan atu mate dau-daun.’ <sup>9</sup>Maibe matenek sira hatan; ‘Keta la to’o ba ami no ba imi, diak liu imi ba sira ne’ebé fa’an hodi sosa ba imi nia an rasik.’ <sup>10</sup>Maibe wainhira sira sosa, noivu to’o mai. Sira ne’ebé pruntu ona, tama hamutuk ho nia ba festa kaben nian, hafoin odamatan taka tiha. <sup>11</sup>La kleur, fetoran sira seluk to’o mai, dehan: ‘Na’i, Na’i, loke odamatan mai ami!’ <sup>12</sup>Maibe nia hatan: ‘Ha’u dehan lialos ba imi katak ha’u la hatene imi.’ <sup>13</sup>Ne’e duni, imi matan moris neon na’in, basa imi la hatene loron ka oras.”

### Aiknanoik osan talenta sira nian

<sup>14</sup>“Sei hanesan mos ema ida ne’ebé, molok atu ba rai seluk, bolu nia atan sira hodi husik ba sira nia rikuso. <sup>15</sup>Ba ida nia fo osan talenta lima, ba ida seluk nia fo rua, ba ida seluk tan nia fo ida; ba ida-ida tuir nia kbiit. Hafoin nia la’o tiha. <sup>16</sup>Ida ne’ebé simu talenta lima ne’e, halo kontratu ho sira hodi manan tan lima. <sup>17</sup>Nune’e mos, ida ne’ebé simu rua, manan tan rua, <sup>18</sup>maibe, ida ne’ebé simu deit ida, ba ke’e rai kuak hodi hakoi subar nia na’i nia osan. <sup>19</sup>Kleur tiha, atan sira ne’e nia na’in fila mai hodi husu sira kona ba nia osan. <sup>20</sup>Ida ne’ebé simu talenta lima hakbesik hodi fo fali lima tan ba nia, dehan: ‘Na’i, ita fo talenta lima mai ha’u, talenta lima tan ne’ebé ha’u manan mak ne’e.’ <sup>21</sup>Na’i dehan ba nia: ‘Diak los, atan diak no laran los; tan o hatudu laran los iha buat ne’ebé kiik, ha’u sei fo buat barak ba o atu tau matan. Tama ba o Na’i nia ksolok.’ <sup>22</sup>Tuir mai ida ne’ebé simu talenta rua hakbesik, dehan: ‘Na’i, ita fo mai ha’u talenta rua; rua seluk ne’ebé ha’u manan mak ne’e.’ <sup>23</sup>Na’i hatan ba nia: ‘Diak los, atan diak no laran los; tan o hatudu laran los iha buat ne’ebé kiik, ha’u sei fo ba o buat barak atu tau matan. Tama ba o Na’i nia ksolok. <sup>24</sup>Ikus liu ida ne’ebé simu talenta ida deit mosu mai, dehan: ‘Ha’u hatene ita boot ema maka’as ne’ebé ku’u iha ne’ebé ita la kuda, halibur iha ne’ebé ita la lekar. <sup>25</sup>Tan ne’e ho tauk ha’u ba subar iha ita nia osan iha rai; buat ne’ebé ita nian mak ne’e.’ <sup>26</sup>Na’i hatan ba nia: ‘Atan aat no barukten! O hatene katak ha’u ku’u iha ne’ebé ha’u la kuda, ha’u halibur iha ne’ebé ha’u la lekar. <sup>27</sup>Ne’e duni, tuir lo-los o sei lori ha’u nia osan ba banku; nune’e, fila tiha mai, ha’u bele foti ha’u nia osan ho funan. <sup>28</sup>Ne’e duni, imi hasa’e tiha talenta husi nia hodi fo ba ida ne’ebé iha sanulu. <sup>29</sup>Basa ba ida ne’ebé iha ona sei fo tan hodi hetan barak liu; maibe ba ida ne’ebé la iha, uitoan ne’ebé nia iha sei hasai tan husi nia. <sup>30</sup>Kona ba atan folin laek ne’e, imi soe tiha nia ba nakukun iha liur, iha ne’ebá nia sei tanis no ruun nehan.”

### Justisa iha loron ikus

<sup>31</sup>“Wainhira Oan Mane mai iha nia gloria ho nia anju sira hotu, Nia sei tur iha nia kadunan gloria nian. <sup>32</sup>Povu hotu sei halibur an iha nia oin. Nia sei haketak ema sira hanesan bibi atan haketak bibi malae husi bibi Timor. <sup>33</sup>Nia sei tau nia bibi malae iha nia sorin kuana, bibi Timor iha nia sorin karuk. <sup>34</sup>Tuir mai, liurai sei dehan ba sira ne’ebé iha nia sorin kuana: ‘Mai, imi ne’ebé Ha’u Aman fo bensa, mai simu nudar liman rohan reinu ne’ebé hadia hela ba imi houri mundu hahu. <sup>35</sup>Basa Ha’u hamlaha, imi fo han Ha’u; Ha’u hamrook, imi fo hemu Ha’u; Ha’u la’o rai, imi simu Ha’u; <sup>36</sup>Ha’u isin tanan, imi fo hatais Ha’u; Ha’u moras, imi ba hare Ha’u; Ha’u iha dadur laran, imi ba hare Ha’u.’ <sup>37</sup>Iha oras ne’e ema diak sira sei hatan ba Nia: ‘Na’i, wainhira los mak ami hare Ita Boot hamlaha, ami fo han; hamrook, ami fo hemu? <sup>38</sup>Wainhira los mak ami hare Ita Boot la’o rai, ami simu; eh ho isin tanan, ami fo hatais? <sup>39</sup>Wainhira los mak ami hare Ita moras eh iha dadur laran, ami ba hare?’ <sup>40</sup>Liurai sei hatan ba sira: ‘Ha’u dehan lialos ba imi: wainhira imi halo buat ne’e ba ha’u nia alin kiik sira ne’e ida, imi halo mai Ha’u rasik.”

<sup>41</sup>“Tuir mai, Nia sei dehan ba sira iha nia sorin karuk: ‘Imi hadook an husi Ha’u ho malisan ba ahi rohan laek ne’ebé hadia hela ba diabu ho nia anju sira. <sup>42</sup>Basa Ha’u hamlaha, imi la fo han Ha’u; Ha’u hamrook, imi la fo hemu Ha’u; <sup>43</sup>Ha’u la’o rai, imi la simu Ha’u; Ha’u isin tanan, imi la fo hatais Ha’u; Ha’u moras, Ha’u iha dadur laran, imi la ba hare Ha’u.’ <sup>44</sup>Sira mos sei husu: ‘Wainhira mak ami hare Ita Boot hamlaha ka hamrook, la’o rai ka isin tanan, moras ka iha dadur laran, ami la tulun?’ <sup>45</sup>Iha oras ne’e, Nia sei hatan ba sira: ‘Ha’u dehan lialos ba imi: wainhira imi la halo buat ne’e ba kiik oan liu sira ne’e ida, imi la halo mai Ha’u.’ <sup>46</sup>Sira ne’e sei ba hetan terus rohan laek, sira ne’ebé diak sei ba hetan moris rohan laek.”

26

### Judeu sira futu lia

<sup>1</sup>Koalia hotu tiha, Jesus dehan ba nia eskolante sira: <sup>2</sup>“Nudar imi hatene, loron rua tan Paskua ona; ema sei saran Oan Mane atu hedi Nia ba krus.” <sup>3</sup>Na’i ulun am’lulik sira nian ho katuas sira povu nian halibur an iha am’lulik boot naran Kaifas nia kadunan, <sup>4</sup>hodi futu lia atu kaer Nia sub-subar, hafoin oho Nia. <sup>5</sup>Maibe sira dehan: “Ita keta halo buat ne’e iha loron festa, atu povu la bele rungu-ranga.”

### Mina morin iha Betania

<sup>6</sup>Wainhira Jesus iha Betania, iha Simao ne’ebé moras lepra nia uma, <sup>7</sup>feto ida ne’ebé lori botil ho mina morin folin boot hakbesik ba Na’i hodi fakar ba nia ulun wainhira Nia sei tur iha mesa. <sup>8</sup>Hare tiha ne’e, eskolante sira hirus, dehan: “Tansa soe deit buat ne’e? <sup>9</sup>Basa mina morin ne’e bele fa’an ho folin boot no bele fo osan ne’e ba ema kiak sira. <sup>10</sup>Maibe hatene tiha buat ne’e, Jesus dehan ba sira “Tansa imi hasusar fetu ne’e? Nia halo buat diak mai Ha’u. <sup>11</sup>Basa kiak sira imi hetan nafatin iha imi leet, maibe imi sei la hetan Ha’u nafatin ho imi. <sup>12</sup>Nia fakar mina morin ne’e ba ha’u nia isin hodi hadia ona Ha’u ba rate. <sup>13</sup>Ha’u dehan lialos ba imi: iha fatin hotu iha mundu tomak ne’ebé sei haklaken liafoun diak ne’e, ema sei haktuir nafatin buat ne’ebé nia foin halo hodi hanoin nia.”

## Judas hasouru Jesus

<sup>14</sup>Tuir mai, sira na'in sanulu resin rua ne'e ida naran Judas Iscariotes, ba buka am'lulikulun sira <sup>15</sup>hodi dehan ba sira: "Ha'u saran karik Nia ba imi liman, imi sei fo hira mai ha'u?" Sira selu ba nia osan mutin tolu nulu. <sup>16</sup>Houri oras ne'e, nia buka tempu diak ida atu saran Jesus.

## Han kalan ba dala ikus

<sup>17</sup>Iha loron uluk festa Paun fermentu laek nian, nia eskolante sira ba husu Jesus; "Ita hakarak ami ba hadia sasan atu han Paskua iha los ne'ebé?" <sup>18</sup>Nia hatan: "Imi ba hasouru ema ida iha sidade hodi dehan ba nia: 'Mestre dehan: 'Ha'u nia tempu to'o tiha ona; Ha'u hakarak halo festa hamutuk ho ha'u nia eskolante sira iha o nia uma.'" <sup>19</sup>Eskolante sira halo tuir buat ne'ebé Jesus haruka hodi hadia sasan ba Paskua. <sup>20</sup>To'o ona loraik Nia tur iha mesa hamutuk ho sira na'in sanulu resin rua. <sup>21</sup>Wainhira sira han dau-daun, Nia dehan: "Tebes Ha'u dehan ba imi; imi ida sei saran Ha'u." <sup>22</sup>Ho neon nakraik teb-tebes, sira ida-ida hahu husu ba nia: "Keta ha'u karik, Na'i?" <sup>23</sup>Nia hatan: "Ida ne'ebé hatama nia liman hamutuk ho Ha'u iha bikan, nia mak sei saran Ha'u. <sup>24</sup>Oan Mane tuir nia dalan nudar hakerek nanis ona kona ba Nia; maibe susar boot ba ema ne'ebé saran Oan Mane ba mate: nia la moris karik kala diak liu!" <sup>25</sup>Judas, ida ne'ebé saran Nia, husu; "Keta ha'u karik, Mestre?" Jesus hatan ba nia: "O rasik mak dehan."

## Eukaristia ba dala uluk

<sup>26</sup>Wainhira sira han dau-daun, Jesus kaer paun, haraik bensa, silu hodi fahe ba nia eskolante sira, dehan: "Simu ba hodi han: ne'e Ha'u nia isin." <sup>27</sup>Hafoin nia kaer kalis, fo agradesé hodi fo ba sira, dehan: "Imi hotu hemu ba: <sup>28</sup>ne'e ha'u nia ran, ran moruk foun nian ne'ebé sei nakfakar atu kasu ema barak nia sala. <sup>29</sup>Ha'u dehan ba imi katak Ha'u sei la hemu tan tua uvas to'o loron ne'ebé Ha'u sei hemu fali nia hamutuk ho imi iha ha'u Aman nia reinu."

## Pedro sei heli lia

<sup>30</sup>Hananu tiha knananuk ida, sira sai hodi ba Foho Ai Oliveira nian. <sup>31</sup>Jesus dehan ba sira: "Kalan ne'e imi nia fiar iha Ha'u sei namlele, basa hakerek nanis ona; 'Ha'u sei hakanek bibi atan, bibi sira sei namkari.'" <sup>32</sup>Maibe moris hi'as tiha husi mate, Ha'u sei ba Galileia uluk liu imi." <sup>33</sup>Pedro hatan ba Nia: "Maski ema hotu husik Ita Boot, ha'u lae!" <sup>34</sup>Jesus dehan ba nia: "Ha'u dehan lialos ba o: iha kalan ne'e kedas, molok manu kokorek, o sei nega Ha'u dala tolu." <sup>35</sup>Pedro simu fali: "Ha'u bele mate ho Ita Boot, maibe ha'u sei la nega Ita." Eskolante sira hotu mos dehan nune'e.

## Orasaun iha to'os

<sup>36</sup>Liu tiha ne'e, Jesus ba ho sira iha to'os ida naran Getsemane. Nia dehan ba eskolante sira: "Imi hela lai iha ne'e. Ha'u sei ba iha ne'ebá halo orasaun. <sup>37</sup>Nia lori Pedro ho Zebedeu nia oan rua. La kleur. Nia hahu oin nakraik, neon susar. <sup>38</sup>Nia dehan ba sira: "Ha'u laran susar to'o mate; imi hela iha ne'e hodi hader ho Ha'u." <sup>39</sup>La'o uitoan ba oin, Nia monu taka oin ba rai hodi harohan: "Ha'u Aman, bele karik, hadook tiha kalis ne'e husi Ha'u; maibe halo tuir Ita hakarak ba, la'os ha'u nian."

<sup>40</sup>Fila tiha ba eskolante sira, Nia hetan sira toba hela. Nia dehan ba Pedro: "Imi la bele hader netik ho Ha'u oras ida deit? <sup>41</sup>Imi matan moris neon na'in ba hodi harohan, atu imi keta monu ba babeur. Espiritu hakarak, maibe isin kbiit laek."

<sup>42</sup>Nia hadook An ba dala rua hodi harohan: "Ha'u Aman, Ha'u sei simu karik kalis ne'e hodi kbiit, ne'e sa halo tuir ita hakarak ba!" <sup>43</sup>Hafoin Nia fila fali hodi hetan sira toba hela, matan dukur. <sup>44</sup>Husik tiha sira, Nia hadook An ba dala tolu atu harohan hodi dehan teni liafuan sira uluk. <sup>45</sup>Tuir mai Nia fila fali ba nia eskolante sira hodi dehan ba sira: "Oras ne'e imi bele toba hodi deskansa. Oras besik ona atu Oan Mane monu ba ema maksalak sira liman. <sup>46</sup>Imi hamriik ba! Ita la'o ona! Ema ne'ebé atu saran Ha'u besik ona mai!"

## Sira kaer Jesus

<sup>47</sup>Jesus sei koalia hela wainhira Judas, sira na'in sanulu resin rua ida, mosu mai ho ema lubun boot ne'ebé kaer surik no ai-dona: sira ne'e, am'lulik boot sira no katuas sira povu nian mak haruka mai. <sup>48</sup>Ida ne'ebé atu saran Nia fo tiha sinal ida ba sira, dehan: "Ida ne'ebé Ha'u rei, Nia mak ne'e, imi kaer Nia!" <sup>49</sup>Nia hakbesik kedas ba Jesus hodi dehan ba nia: "Salve, Mestre!" Hafoin nia rei Jesus. <sup>50</sup>Jesus dehan nia: "Belun, o mai atu halo sa ida?" Tuir mai sira hakat ba oin, kaer hodi futu Nia. <sup>51</sup>Teki-teki Jesus nia eskolante ida losu nia surik, ta am'lulik boot nia atan ida hodi tesi tiha nia tilun ida. <sup>52</sup>Jesus dehan ba nia: "Hatama o nia surik ba nia fatin, basa ema hotu ne'ebé kaer surik, sei mate ho surik. <sup>53</sup>O hanoin katak Ha'u la bele harohan ba ha'u Aman atu haruka kedas mai Ha'u anju lubun sanulu resin rua? Maibe oin sa mak sei sai tuir Eskritura sira ne'ebé dehan katak buat hotu sei sai tuir nune'e?" <sup>55</sup>Iha oras ne'e, Jesus dehan ba ema lubun boot: "Imi mai hanesan atu kaer na'okten ruma, ho surik no ai-dona atu kaer Ha'u. Loron loron Ha'u tur iha Templu hodi hanorin, imi la kaer Ha'u. <sup>56</sup>Buat sira ne'e hotu mosu atu halo tuir Profeta sira nia lia iha Eskritura sira." Ho ne'e, eskolante sira hotu husik Nia hodi halai lakon.

## Jesus iha tribunal

<sup>57</sup>Ema sira ne'ebé kaer Jesus lori Nia ba am'lulik boot Kaifas nia uma; iha ne'ebá eskriba sira ho katuas sira povu nian halibur an hamutuk. <sup>58</sup>Pedro tuir husi dook to'o am'lulik boot nia kadunan. Tama tiha, nia tur hamutuk ho atan sira atu hare buat hirak ne'e sei sai oin sa los.

<sup>59</sup>Am'lulikulun sira nia maluk hotu buka namanas lia bosok hasouru Jesus atu saran nia ba mate; <sup>60</sup>maibe la hetan, maski mosu sasin falsu barak. Ikus mai mosu sasin rua ne'ebé dehan: <sup>61</sup>"Ema ne'e hateten: 'Ha'u bele sobu tiha Maromak nia Templu hodi harii fali iha loron tolu nia laran.'" <sup>62</sup>Am'lulik boot hamriik hodi husu ba Nia: "O la hatan buat ida ba lia hirak ne'e hasoura O?" <sup>63</sup>Maibe Jesus nonok hela. Am'lulik dehan teni ba Nia: "Hodi Maromak moris nia naran ha'u husu ba O atu dehan los; O mak Kristu, Maromak Oan, ka lae?" Jesus hatan ba nia: "Ita rasik mak dehan buat ne'e. <sup>64</sup>Maibe Ha'u dehan ba imi katak loron ida imi sei hare Oan Mane tur iha kbiit Na'in nia sorin kuana, hafoin tun mai husi lalehan iha kalohan leten." <sup>65</sup>Ho ne'e, am'lulik boot les nia hatais hodi dehan: "Nia koalia aat hasoura Maromak! Ita buka tan sasin sa ida? Imi rasik mak rona nia lia aat. <sup>66</sup>Imi hanoin oin sa?" Sira hatan: "Nia soi atu mate!"

<sup>67</sup>Tuir mai sira tafui ba nia oin hodi tuku Nia. Sira seluk basa Nia hodi dehan: <sup>68</sup>"Kristu, si'ik to'ok! Se mak baku o?"

## Pedro nega Jesus

<sup>69</sup>La kleur, wainhira Pedro tur dau-daun iha uma oin, atan feto ida hakbesik ba nia hodi dehan; "O mos hamutuk ho Jesus Galileia nian." <sup>70</sup>Maibe nia heli lia iha ema hotu nia oin, dehan; "Ha'u la hatene o koalia kona ba sa ida!" <sup>71</sup>Nia sai tiha ba odamatan, atan feto seluk hare nia hodi dehan ba sira ne'ebé iha ne'ebá: "Ida ne'e mos hamutuk ho Jesus Nazare nian." <sup>72</sup>Dala ida tan nia heli lia ho juramentu: "Ha'u la hatene ema ne'e." <sup>73</sup>La kleur, sira ne'ebé iha ne'ebá hakbesik ba Pedro hodi dehan: "Los duni, o mos nia emar sira ida, basa o nia lia hatudu o nune'e." <sup>74</sup>Nia hahu hotar ho juramentu hodi dehan, "Ha'u la hatene ema ne'e!" Iha oras ne'e kedas, manu kokorek. <sup>75</sup>Pedro hanoin kona liafuan ne'ebé Jesus uluk dehan: "Molok manu kokorek, o sei nega Ha'u dala tolu." Hafoin, sai tiha ba liur, nia tanis ho neon sala.

## Jesus iha Pilatos nia oin

<sup>1</sup>To'o tiha dader, am'lulik boot hotu ho katuas sira povu nian halibur hamutuk hodi futu lia atu oho Jesus. <sup>2</sup>Sira futu Nia, hafoin lori hodi saran Nia ba emboot Pilatos.

## Judas nia mate

<sup>3</sup>Hare tiha katak sira tesi lia hasoura Jesus, Judas ne'ebé saran Nia, hakribi nia sala no ba fo fali osan mutin tolu nulu ba am'lulik boot sira no ba katuas sira hodi dehan: <sup>4</sup>"Ha'u sala hodi saran ran sala laek." Sira hatan: "Ami iha buat ruma ho ne'e? O mak hatene." <sup>5</sup>Soe tiha osan sira iha templu, nia sai hodi ba tara an. <sup>6</sup>Maibe am'lulik boot hili osan sira ne'e hodi dehan: "Ita la bele tau osan ne'e iha osan fatin, basa ne'e ran nia folin." <sup>7</sup>Koalia hamutuk tiha, sira ba sosa to'os

ida atu halo rate ida ba ema la’o rai sira. <sup>8</sup>Tamba ne’e, to’o ohin loraon ema hanaran to’os ne’e rai ran nian.” <sup>9</sup>Nune’e sai tui duni lia ne’ebé profeta Jeremias dehan nanis: “Sira simu osan mutin tolu nulu, folin ne’ebé Israel oan sira hanoin naton atu sosa Nia, <sup>10</sup>hodi ba sosa rai ema halo sana nian nia to’os nudar Na’i haruka ha’u.”

<sup>11</sup>Jesus hamriik iha emboot nia oin ne’ebé husu ba Nia: “O Judeu sira nia liurai?” Jesus hatan: “Ita rasik mak dehan.” <sup>12</sup>Maibe wainhira am’lulik boot sira ho katuas sira dun Nia, Nia la hatan buat ida. <sup>13</sup>Tan ne’e, Pilatos dehan ba Nia: “O la rona buat hotu ne’ebé sira dehan hasouru O?” <sup>14</sup>Maibe Nia la dehan buat ida, halo emboot hakfodak.

<sup>15</sup>Tinan tinan iha loraon festa emboot toman atu husik sai husi kadeia ema dadur ida ne’ebé povu husu. <sup>16</sup>Iha tempu ne’e, iha ema dadur ida naran Barrabas ne’ebé ema hotu hatene. <sup>17</sup>Wainhira povu halibur an hamutuk, Pilatos husu ba sira: “Imi hakarak ha’u husik ida ne’ebé: Barrabas, ka Jesus ne’ebé ema bolu Kristu?” <sup>18</sup>Basa Nia hatene katak sira saran Nia tan laran moras. <sup>19</sup>Wainhira Pilatos tur hela iha tribunal, nia feen haruka dehan ba nia: “O keta tama kahur tan ho ema diak ne’e, basa ohin ha’u terus teb-tebes tan mehi ida kona ba Nia.” <sup>20</sup>Maibe am’lulik boot sira ho katuas sira soran povu atu husu Barrabas hodi halakon Jesus. <sup>21</sup>Ne’e duni, wainhira emboot husu ba sira: “Sira na’in rua ne’e, imi hakarak ha’u husik ida ne’ebé los?” Sira hatan: “Barrabas!” <sup>22</sup>Pilatos dehan ba sira: “Ba Jesus ne’ebé hanaran Kristu, Ha’u sei halo sa ida?” Sira hatan: “Hedi Nia ba krus!” <sup>23</sup>Pilatos dehan teni: “Nia halo sala sa ida?” Maibe sira hatan ho lia maka’as liu tan: “Hedi Nia ba krus!” <sup>24</sup>Pilatos hare Nia la bele halo tan buat ida, ema sira mos hetok haklalak liu tan, nia fase liman iha ema lubun boot nia oin hodi dehan: “Ha’u nia liman mos kona ba ema ida ne’e nia ran: buat ida ne’e imi nian.” <sup>25</sup>Povu tomak hatan: “Husik nia ran monu iha ami mo ba nia oan sira leten!” <sup>26</sup>Tuir mai Pilatos husik tiha Barrabas, hafoin haruka baku Jesus hodi saran Nia ba sira atu hedi Nia ba krus.

### Jesus to’o mate iha krus

<sup>27</sup>Emboot nia soldadu sira lori Jesus ba pretoriu. Iha ne’ebá soldadu sira hale’u Nia. <sup>28</sup>Sira kolu nia hatais hodi taka fali ho unuk mean ida. <sup>29</sup>Hafoin sira leu ai-tarak hamutuk hodi tau iha nia ulun; sira halo nia kaer fafulu ida ho nia liman los. Sira hakneak iha nia oin hodi hamoe Nia, dehan: “Salve, Judeu sira nia liurai!” <sup>30</sup>Tuir mai sira tafui ba Nia, kaer fafulu ne’e hodi baku nia ulun. <sup>31</sup>Hamoe tiha Nia, sira kolu unuk mean hodi fo fali nia hatais. Hafoin sira lori Nia atu hedi iha krus. <sup>32</sup>Wainhira sira sai ona, sira hetan mane ida husi rai Sirene, naran Simao hodi obriga nia atu lori Jesus nia krus. <sup>33</sup>To’o tiha fatin ida naran Golgota, katak “fatin ulun ruin nian,” <sup>34</sup>sira fo tua kahur naan horun ba Nia; maibe koko tiha, Nia lakohi hemu. <sup>35</sup>Hedi tiha Nia iha krus, sira fahe ba malu nia hatais sira hodi koko sorte; <sup>36</sup>hafoin sira tur iha ne’ebá hodi hein Nia. <sup>37</sup>Iha Nia ulun leten sira hakerek lia ne’ebé fo sai tansa Nia mate: “Ne’e Jesus, Judeu sira nia liurai.” <sup>38</sup>Hamutuk ho Nia, sira hedi mos iha krus ema ahu na’in rua, ida iha sorin los, ida iha sorin karuk. <sup>39</sup>Sira ne’ebé liu dau-daun, hateten aat Nia, doko ulun, dehan: <sup>40</sup>“O ne’ebé dehan katak o bele sobu Templu hodi harii fali nia iha loraon tolu nia laran, soi o nia an ba! O Maromak nia Oan karik, tun husi krus ba, atu ami bele fiar O! <sup>41</sup>Na’ilulik boot no eskriba sira ho katuas sira mos hamoe Nia hodi dehan: <sup>42</sup>“Nia soi ema seluk, maibe la bele soi Nia an rasik! Nia liurai Israel nian karik, tun lai husi krus, hafoin ita sei fiar nia! <sup>43</sup>Nia tau laran metin ba Maromak : Maromak hakarak Nia karik, husik Maromak soi Nia, basa Nia dehan, ‘Ha’u Maromak nia Oan.” <sup>44</sup>Ahu-na’in sira ne’ebé hedi ho Nia iha krus mos hateten aat Nia nune’e.

<sup>45</sup>Hahu loraon fahe rua to’o tuku tolu loraik, rai tomak sai nakukun. <sup>46</sup>Besik tuku tolu Jesus hakilar ho lia maka’as: “Eli, Eli lama sabaktani?” katak, “Maromak, Ha’u nia Maromak tansa Ita husik Ha’u?” <sup>47</sup>Rona tiha ne’e, ema balun ne’ebé iha ne’ebá dehan: “Nia bolu Elias!” <sup>48</sup>Sira ida halai kedas, hola hena ne’ebé habokon iha tua sin, tau iha fafulu ida hodi fo hemu Nia. <sup>49</sup>Maibe sira seluk dehan: “Husik ba! Hare to’ok Elias mai soi Nia, ka lae!” <sup>50</sup>Tu’ir mai, hakilar maka’as dala ida tan, Jesus iis kotu.

<sup>51</sup>Teki-teki hena templu nian nakles fahe ba rua, husi leten to’o kraik. Rai nakdoko, fatuk sira nakfera; <sup>52</sup>rate sira nakloke. Ema santu sira barak nia isin mate moris fali, <sup>53</sup>ema sira ne’e, liu tiha Jesus nia moris hi’as, sai husi rate no tama iha sidade santa hodi mosu ba ema barak. <sup>54</sup>Hare tiha rai nakdoko ho tan buat hotu ne’ebé mosu dau-daun, kapitaun ho soldadu sira ne’ebé hein Jesus tauk teb-tebes hodi dehan: “Los duni, ida ne’e Maromak oan.”

<sup>55</sup>Hamri’ik mos iha ne’ebá hodi hateke husi dook, feto barak ne’ebé tui Jesus husi Galileia hodi serbi Nia. <sup>56</sup>Sira ne’e balun mak Maria Magdalena, Maria, Tiago ho Jose nia inan; ho tan Zebedeu oan sira nia inan.

### Sira hako Jesus

<sup>57</sup>Besik kalan, ema riku ida husi Arimateia, naran Jose, ne’ebé mos Jesus nia eskolante ida, to’o mai. <sup>58</sup>Nia ba koaliala ho Pilatos hodi husu Jesus nia isin. <sup>59</sup>Jose falun nia isin iha lensol mos ida, <sup>60</sup>hodi tau Nia iha ninia rate foun ida ne’ebé nia ke’e tiha iha fatuk. Hafoin nia duir netik fatuk boot iha rate ibun hodi ba tiha. <sup>61</sup>Maria Magdalena ho Maria ida seluk hela iha ne’ebá, tur hela iha rate oin. <sup>62</sup>Liu tiha loraon ida, katak liu tiha loraon hadia Paskua nian, am’lulik boot sira no fariseu sira ba hamutuk hare Pilatos hodi dehan ba nia: <sup>63</sup>“Na’i, ami la haluha buat ne’ebé ema aat ne’e dehan wainhira Nia sei moris hela: ‘Liu iha loraon tolu, Ha’u sei moris fali.’ <sup>64</sup>Ne’e duni, haruka ema atu hein netik rate to’o loraon tolu; keta eskolante sira mai na’ok nia, hafoin dehan ba povu: ‘Nia moris fali husi mate.’ Lia bosok ne’e sei sai aat liu fali ida uluk.” <sup>65</sup>Pilatos hatan ba sira: “Imi iha guarda sira; ba hodi hein nudar imi hatene.” <sup>66</sup>Sira ba taka metin rate ho fatuk ida hodi tau guarda sira.

### Jesus moris hi’as

<sup>1</sup>Liu tiha loraon Sabadu iha dadersan nakukun loraon uluk semana nian, Maria Magdalena no Maria, ida seluk ba hare rate. <sup>2</sup>Teki-teki rai nakdoko maka’as, basa Na’i nia Anju ida tun husi lalehan, hakbesik mai, duir tiha fatuk hodi tur iha nia leten. <sup>3</sup>Nia oin hanesan neve. <sup>4</sup>Guarda sira nakdedar ho tauk ba nia, to’o sai hanesan mate. <sup>5</sup>Maibe anju koaliala hodi dehan ba feto sira: “Imi keta tauk. Ha’u hatene imi buka Jesus, ne’ebé ema hedi Nia iha krus. <sup>6</sup>Nia la iha ne’e, basa nia moris hi’as tiha ona nudar uluk Nia dehan. Imi hare fatin ne’ebé sira hatoba Nia ba. <sup>7</sup>Imi ba hodi dehan ba nia eskolante sira: ‘Nia moris hi’as ona husi mate.’ Nia sei ba uluk liu imi iha Galileia. Imi sei hare Nia iha ne’ebá. Ha’u fo sai ona ba imi.”

<sup>8</sup>Feto sira husik lalais rate. Ho tauk no ksolok boot sira halai ba fo hatene ba eskolante sira. <sup>9</sup>Teki-teki Jesus mai hasouru sira, dehan: “Salve!” sira hakbesik, hakoak nia ain hodi adora Nia. <sup>10</sup>Jesus dehan ba sira: “Keta tauk; imi ba dehan ba Ha’u nia maun alin atu ba Galileia; iha ne’ebá sira sei hare Ha’u.”

<sup>11</sup>Wainhira sira la’o tui dalan, guarda balun ba sidade laran hodi fo hatene ba am’lulik boot sira buat hotu ne’ebé mosu. <sup>12</sup>Sira ne’e halibur hamutuk ho katuas sira. Hafoin, sira lia tui malu hotu tiha, sira fo osan barak ba soldadu sira <sup>13</sup>hodi dehan ba sira: “Imi sei dehan ba povu: ‘Nia eskolante sira mai iha kalan hodi na’ok Nia wainhira ami toba dau-daun.’ <sup>14</sup>Lia ne’e monu karik ba emboot nia tilun, ami mak sei koaliala ho nia, atu imi la bele hetan susar.” <sup>15</sup>Simu tiha osan, sira halo tui lia ne’ebé sira rona. Lia bosok ne’e namkari iha Judeu sira leet to’o ohin loraon.

### Jesus nia lia menon ikus

<sup>16</sup>Eskolante sanulu resin ida ne’e la’o ba Galileia, ba foho ne’ebé uluk Jesus hatudu ba sira. <sup>17</sup>Hare tiha Nia, sira adora Nia; maibe sira balun nia laran sei namlele hela. <sup>18</sup>Jesus hakbesik hodi koaliala ba sira, dehan: “Kbiit tomak iha lalehan no rai fo tiha ona mai Ha’u. <sup>19</sup>Ne’e duni, imi ba hanorin nasaun hot-hotu; sarani sira hodi Aman, Oan no Espiritu Santu nia naran, <sup>20</sup>hanorin sira atu halo lo-los buat hotu ne’ebé Ha’u haruka ba imi. Ha’u sei hela nafatin hamutuk ho imi, to’o mundu nia rohan.”